

Reví  
**LALIT**  
d e k l a s  
Enn Piblikasyon Lagazet Lalit deklas

Rs. 20.00

No. **123**  
M E - Z I N  
2 0 1 6

Editoryal:  
**PURITIR dan**  
**LETA BURZWA**  
Paz 3

DOSYE ITILIZASYON LATER  
**ABITAN B.du CAP v/s**  
**PROZE IRS MONROZE**  
Paz 5

LAGER KLAN PARMÍ  
KAPITALIS FINANSYE  
**PANAMA PAPERS**  
Paz 12

**ALTERNANS:**  
**SO DAT EXPIRASYON**  
**PE ARIVE?**  
Paz 13

SKANDAL MINIS PAR MINIS  
**ANEEROOD JUGNAUTH**  
**LUTCHMEENARAIDOO,**  
**BHADAIN, DAYAL,**  
**SOODHUN, GAYAN,**  
**GUNGAH**  
Paz 14


**GID PU SOSYALIST:**  
**12 PWIN**  
Paz 18

DOSYE  
**FINANSMAN**  
**PARTI POLITIK**  
Paz 23

**FESTIVAL MAMA JAZ**  
Paz 28

**KRASH MALAYSIA AIRLINES:**  
**FRAGMAN ek KESTYON**  
Paz 29

KANPAYN LALIT  
KUMANS MORDE:  
SAJ LOR DEFANSIV  
Paz 27



**LIBER**  
**OSCAR LOPEZ RIVERA**  
Paz 31

# KONTENI

Nimero 123

Me 2016 - Zin 2016

EDITORIAL: Puritir dan Leta Burzwa .....	3
Jabaljas ek Bulbak .....	4
Dosye Itilizasyon Later .....	5
I.R.S., Gated Communities, Smart Cities: Abitan Baie du Cap v/s Proze MonRoze ..	5
Kozri Baie du Cap: Mobilizasyon kont IRS .....	5
Petisyon abitan Baie du Cap .....	6
Rol Georges Ah Yan .....	7
Smart Cities: Kanpayn LALIT Kozri Deba .....	7
Kan Patron Koz Smart Cities, ki li pe koze? .....	7
Komye Kolonizater Guvernman pe Amene? .....	7
Smart Cities, Kisannla so Plan .....	8
Rs600 milyon pu sime Smart City: Guvernman Abandonn Fami Richelieu .....	9
Soodhun, Minis Lozman okip Zis Smart City? .....	10
Petisyon Abitan Site Richelieu: Soodhun pa reponn .....	10
Lalwa Smart City, Dan Ki Lintere? .....	11
Kozri Deba LALIT St Pierre .....	11
Lindistri Sikriyer: Nuvo Atak kont Klas Travayer .....	11
Lager Klan dan klas kapitalist finansye mondyal: Panama Papers .....	12
Dosye Kriz Politik .....	13
Alternans: Dat Expirasyon pe Arive? .....	13
Premye Minis San Prinsip: Aneerood Jugnauth .....	14
Pravind v/s Aneerood .....	14
Lutchmeenaraidoo .....	15
Bhadain .....	15
Raj Dayal .....	16
Soodhun .....	16
Gayan .....	17
Gungah .....	17
Thierry Henry .....	17
Gid pu Sosyalist: 12 Pwin .....	18
Dosye Langaz Kreol .....	20
Lang Kreol dan Parlman: Pozisyon Retrograd Aneerood Jugnauth .....	20
Ziz Lam Shang Leen .....	21
Leela Devi Dookhun .....	21
INFO INFO INFO .....	22
Dosye Finansman Parti Politik .....	23
Rapor Duval: Kontrol Par Leta Enn Menas Grav pu Laliberte .....	23
Ki LALIT dir pu kontre Koripsyon Eleksyon par Burzwazi .....	23
Rapor Duval: Viz Blok Parti Travayer .....	24
PMSD v/s Komite Duval .....	24
Kifer Asterla ki Finansman Inportan Enn Ku? .....	24
Lezot Size ki Komite Duval sipoze pe gete .....	24
Lextrem Drwat Finans Kanpayn anfavor Limitasyon Manda .....	25
Travay parfwa, Depans Tultan .....	24
Expo Lar dan Grenye .....	24
Plizir Viktwar lor ID KARD .....	26
Inkoerans Guvernman Lalyans Lepep lor ID Kard .....	26
Amandman Lalwa Travay pu Fors Travayer donn lanprint pu prezans Abandone .....	26

(Vir paz pu leres Konteni)

Kanpayn LALIT kumans morde: Jugnauth lor Defansiv .....	27
Craft Aid Lisansye 129 Travayer .....	27
Festival Mama Jaz .....	28
LALIT an Aksyon .....	28
Krash Malaysia Airlines: Fragman ek Kestyon lor Diego Garcia .....	29
Rapor Konferans "Marxism 2016" Melbourne .....	30
Lefe Kanpayn BDS; G4S Security Aret Investi dan Israel .....	31
Liber Oscar Lopez Rivera .....	31
Sinpozyom LALIT lor O.N.G. ....	32

Pibliye e inprime par LALIT, 153 Rut Rwayal, GRNW, Port Louis, Repiblik Moris. Pri Rs20/-

[www.lalitmauriti.us.org](http://www.lalitmauriti.us.org)

208 2132 ek 208 5551

lalitmail@intnet.mu  
 YouTube Chanel: lalit mauriti.us  
 SoundCloud Chanel: lalit mauriti.us

# Puritir dan Leta Burzwa

## Ki ete leta burzwa?

Pu nu dan LALIT, Leta li pa zis rezim politik o-puvwar, me li anglob osi parlman, lezislasyon ki parlman vote e ki an viger, lapolis e zidisyer ki impoz sa bann lalwa la, tu sa bann institisyon etatik ki implemant politik rezim o-puvwar, e medya e sistem ledikasyon ki propaz ideoloji dominan. Nu apel sa leta la enn leta burzwa, parski dan so globalite li reprezant lintere klas dominan, setadir burzwazi e sistem kapitalist. Alor kan nu koz puritir dan leta burzwa, nu pe get disfonksyonman dan tu sa diferan konpozan leta burzwa.

## Kriz sistemik

Depi plis ki 10 an, LALIT pe expoz sa kriz sistemik ki prezan, sirtu o-nivo ekonomik: avek globalizasyon e regleman WTO, 2 sektor mazer dan lekonomi Repiblik Moris finn rant dan enn sityasyon kriz: lindistri sikrier e zonn frans ti 2 sektor ki ti anplway enn gran mazorite travayer dan peyi. Asterla, apre kriz finansye e banker apartir 2007, se kapital finansye internasyonal ki pe rant dan enn sityasyon kriz: sektor "off-shore" dan Moris ek lezot paradi fiskal su menas.

Alor sa kriz sistemik pe aprofondi, sirtu ki diferan guvernman dan dernye 10 an pa finn fer gransoz pu devlop enn lekonomi alternativ.

Se zisteman sa kriz sistemik dan sistem kapitalist ki zordi pe presipit sa kriz politik e institisyonel dan peyi.

## Nuvo Rezim Politik Lalyans Lelep.

Guvernman Lelep MSM-PMSD-ML finn o-puvwar depi selman 16 mwa: li kler zordi ki sa lalyans la finn gayn enn mazorite preske trwa kar dan Parlman sirtu parski elektora ti rezet proze politik Ramgoolam/Bérenger. Lalyans Lelep pa ti ena okenn koerans ideolojik ubyen programatik: laplipar nuvo depite e minis ti san okenn kiltir politik.



Alor kriz sistemik finn presipit enn dezekilib dan diferan konpozan leta e finn amenn enn puritir san prezedan dan leta burzwa.

Apre selman 16 mwa, guvernman finn oblize fer tu kalite remaniman ministeryel an katastrof: Pravind Jugnauth finn demisyone kuma Minis kan lakur finn truv li kupab dan zafer Med Point; Dayal finn li osi oblize demisyone parski ena alegasyon koripsyon kont li; Bhadain finn geyn minister Pravin Jugnauth e apre li finn reperdi li; Lutchmeenaraidoo finn buz depi Finans a Zafer Etranzer parski "pwalon la ti tro so"; Sinatambou finn

buz depi Zafer Etranzer a Teknolozi e Kominikasyon (ansyen minister Pravind Jugnauth!); Soodhun pe bizin defann limem pu enn bil ki li pa finn peye dan klinik Apollo e lor enn tranzaksyon later ki implik so garson. Aneerood Jugnauth finn oblize azut Minister Finans a bann lezot responsabilite ministeryel ki deza ti ase lur pu li.

Sa seri konfli dan guvernman finn amenn kolaps prinsip responsabilite kolektiv dan kabine minis, kot diferan minis pe fer akizasyon grav kont lezot minis an piblik.

Parmi bann depite, Danielle Selvon finn kit Lalyans Lelep, Fowdar pa tro kone kot li ete dan ML. e Bashir Jahangeer azir plis kuma enn depite lopoziyon.

Diferan parti dan Lalyans Lelep finn travers enn seri instabilite: MSM so lider pa dan Kabine Minis, e PMSD pe bizin zer problem Richard Duval e Thierry Henry ki implike dan aksidan grav.

Kuma kapav atann, kriz dan leta burzwa afekte lopoziyon parlamanter osi: grup parlamanter MMM finn kas an 2 ek formasyon MP, e Travayis pe oblize trenn tu bann kastrol deryer Navin Ramgoolam.

Mem dan zidisyer ena enn seri problem ki finn lev latet: DPP su latak depi minis guvernman; ansyen Sef Ziz pe atak Ziz an fonksyon e Minis; ena avoka ki pe refiz paret divan serten ziz.

Sistem banker rant an debandad kan minis pe denons minis pu bann tranzaksyon ki

sipoze rest sekre, ek tusala al fini divan ICAC.

Otur demantelman BAI, nu finn trov manyer ki bann institisyon finansye e mem bann firm oditer pa finn fonksiyone kuma zot sipoze.

Dan sa dernye 16 mwa ki Lalyans Lepep finn o-puvwar, finn ena enn seri nominasyon ki montre ki nuvo guvernman pa meyer ki ansyen Guvernman Travayis lor size favoritism, ek sa finn

kree buku fristrasyon.

### Konklizyon

Nu dan enn sityasyon kot leta burzwa dan so lansanb an kriz, e guvernman pe persiste avek so politik ekonomik ki depann lor spekilasyon later otur sipoze “smart Cities”, ki pa pe kree lanplwa stab, ki pe menas lasante gratis e *Welfare State*, ki pena enn veritab politik pu rezud kriz lozman e problem sekirite alimanter.

Li kler ki lopoziyon dan Parlman nepli reprezant enn alternativ kredib, alor nu bizin viz pu kree sa veritab lopoziyon andeor parlman ki kapav denons sa guvernman ki pe grene, e an mem tan propoz enn nuvo lelan pu devlopman ekonomik ki kapav fer fas a kriz sistemik, ki kapav kree lanplwa e asir sekirite alimanter.

## Jabaljas ek Bulbak



**Jabaljas:** To finn tande, Bulbak, ki Minis Finans Lutchmeenaraidoo finn dir lor so koleg Minis Bhodain.

**Bulbak:** Get sa Jabaljas, to bizin deside: to pe koz Minis Bodha ubyen Minis Bhadain ? De tut fason, Lutchmeenaraidoo nepli Minis Finans.

**Jabaljas:** Mo krwar mo pe koz Bhadain. Abe ki finn ariv Lutchmeenaraidoo?

**Bulbak:** To pa rapel, li ti geyn enn bronsit ki ti pe fatig li terib, lerala PM finn dir li al repoze dan Minister Zafer Etranzer.

**Jabaljas:** Abe sa minis ki ti pe repoze dan Zafer Etranzer, kot li finn al repoze aster?

**Bulbak:** Li finn return dan Minister Teknolozi ek Kominikasyon, kot li ti ete dan ansyen guvernman. To kone sa minister ki ti okipe par Pravin Jugnauth avan li kondane, ek lerala minister la finn al ek Bhadain.

**Jabaljas:** Zisteman to finn fer mwa rapel ki mo ti pu dir twa lor seki Lutchmeenaraidoo finn dir lor Bhadain.

**Bulbak:** Degaze dir mwa, taler to pu re-bliye ankor.

**Jabaljas:** Li finn dir ki Bhadain azir wadire KGB.

**Bulbak:** Laverite, sa enn zafer byen grav pu enn minis dir lor so koleg dan mem guvernman.

**Jabaljas:** Ek seki pli grav, se ki Premye Minis pa dir nanye kan finn dir li ki ena enn mam KGB dan so kabine.

**Bulbak:** Mo pa krwar Lutchmeenaraidoo finn ule dir literalman ki Bhadain enn mam KGB. Par kont li finn dir ki Bhadain pe fer konplo pu detrir li politikman.

**Jabaljas:** To truve! La usi PM Jugnauth pa dir nanye: wadire li per pu met lord, taler enn ladan ale ek lerala pu ena eleksiyon parsyel.

**Bulbak:** Kapav et PM pe atann zizman lapel Pravind, lerala li pu kapav deside lekel dan sa 2 konper la li pu balans dan karo kann.

**Jabaljas:** Me antretan, Bulbak, bann renyon Kabine Minis devet kuma enn nik serpan. An pasan, ki ete sa zafer KGB?

**Bulbak:** Sa ti ansyen servis espyonaz Linyon Sovyetik, kuma CIA tuzur ete pu Lamerik.

**Jabaljas:** Abe sa bann vye zafer lager frwad sa. Mo ti krwar zordi zur KGB ule dir Kabine Gran Bordel.

# Abitan Baie du Cap v/s Proze I.R.S. MonRoze

Kisannla kontrol later Moris?

Eski Guvernman pu permet patron tablisman kapav kontiyn kontrol tu later?

E sa. sanki zot kree anplwa? Sanki patron pey tax?

Eski nu kapav permet tablisman betonn later agrikol?

Sirtu amizir ki kann ek disik pe gayn beze?

Ki kalite devlopman sa? Baze lor spekilasyon later!

Mem Jugnauth lor defansiv lor la, kan li zwenn patrona.

Kot sekirite alimanter ladan? Kot lozman pu lepep ete ladan?

Abitan Baie du Cap finn fer apel a *Lalit* pu donn enn kudme dan enn difikilte grav ki zot pe gayne. LALIT so *Rezyonal Lwes* finn reponn. E nu finn dekuver ki seki zot pe sibir, li enn mikrokosm seki klas travayer, planter ek peser pe sibir, an zeneral dan pei la net.

## Problem lepep Moris

Problem abitan Baie du Cap, li mem mem difikilte, lor enn tipti lesel, ki totalite abitan Moris ki travay pu viv pe bizin fer fas: Guvernman ek tablisman finn aboli surs reveni dimunn, tablisman kontiyn monopoliz tu later agrikol, e Guvernman finn swazir pu sumet divan lintere patron tablisman san get tu sa bann fami ki finn perdi plas travay lor tablisman.

## Tablisman met deor, mulin ek lizinn ferme

Pli prezizeman, tablisman finn met deor travayer Baie du Cap, zot plas travay siprime, atraver *Blueprint* pu artizan ek VRS (*Voluntary Retirement Scheme*) pu laburer. Asterla, kapitalist pe kareman al betonn later. Tusala sanki Guvernman fors tablisman diversifye so plantasyon, met dibut lizinn pu prezerv prodwi alimanter, e gard travayer.

Travayer lizinn finn truv tu sa lizinn zonn frans Surinam, Ch. Grenier Chamouny ferme, enn apre lot, sanki nuvo lizinn kree. Sa osi, li parey kuma partu dan pei.

Peser finn truve ki lamer nepli garanti enn rant pu zot fami. Sa degradasyon dan rant peser, li finn arive par mank volonte

Guvernman ek kapitalist pu met dibut enn lindistri lapes, par mank volonte protez lagon ek lamer zis andeor lagon.

E sa osi, li parey partu dan pei.

## Later

Alor, kestyon *later* vinn lor azanda.

Nu repet mem paragraf lao: *Kisannla kontrol later Moris? Eski patron tablisman kapav kontiyn kontrol tu later sanki li kree*

*anplwa? Sanki li pey tax? Eski nu kapav permet tablisman betonn later agrikol? Sirtu a-mizir ki kann ek disik pe gayn beze?*

## Aksyon Abitan Baie du Cap

Ena petisyon ki abitan Baie du Cap finn drafte pandan 2-3 reynion ar manb Lalit (*Rezyonal Lwes*), siyene, avoy kot Minis (Vir paz):

## KOZRI BAIE DU CAP

## MOBILIZASYON KONT I.R.S.

LALIT ek abitan Baie du Cap ti fer enn Kozri-Deba lor size “*IRS, kuma MonRoze, ek Smart Cities? Ki kalite devlopman nu ule?*”.

Li ti Zedi 14 Avril e li finn reyni enn 50-enn dimunn – abitan Baie du Cap ek landrwa avwazinan, kuma Bel Om ek St. Martin, Chamouny, ek pli lwin dan rezyon, kuma Riviere Noire, La Gaulette, Albion, Bambous. Li ti dan Batiman Komersyal, ti kumanse 5:30 pm e ti termine 7:00 pm. Li ti prezide par Stenio Laïde avek kudme Benjamin Perle depi lasal.

Lindsey Collen lor nom LALIT ti koz lor kimanyer Guvernman finn permet St. Felix ek Bel Ombre lisansye preske tu zot laburer ek artizan, sanki li fors tablisman re-organiz later Moris pu ki li prodir manze, sanki li fors tablisman konverti so mulin an lizinn ki prezerv prodwi alimanter. Asterla, Guvernman finn akord enn permi – ki zordi abitan pe remet an-kestyon (get

petisyon) – pu enn patron Franse ki fami ek enn patron tablisman kree 2 lotel, buku apartman ek vila – enn total 144 inite – omilye vilaz Baie du Cap.

Sa kalite devlopman la, li fer buku destriksyon. Bizin remet li ankestyon, Lindsey Collen finn dir.

Kisna Kistnasamy, osi pu LALIT, finn koz lor 4 diferan kalite Smart Cities. Li finn dir seki pe arive dan Baie du Cap, li donn enn apersi kimanyer stratezi Smart Cities pu devlope. Li finn met buku lanfaz lor linportans primordyal kestyon later. Kisannla deside kimanyer servi later enn pei? Li finn rekonet linportans ki abitan Baie du Cap, kan zot pe defann zot drwa a later ek lamer, osi zwenn ansam ar tu lezot lafors ki pe lev lavwa kont sa kalite devlopman la.

Deba ti interesan, avek kontribisyon plizir dimunn depi lodyans ki res Baie du Cap ek enn depi St. Martin.

“Nu, abitan Be di Kap, pe ekrir u pu dir u ki nu pe *opoz* sa Proze IRS zis akote nu lakaz dan Be di Kap. Antan ki nuvo Minis Lanvironnman (par interim), nu pe dimann u aret li. Enn promoter pe vinn detrir nu vilaz. Nu pa kone kimanyer li finn gayn enn EIA. E nu dut for ki, detutfason, Proze la pa pe respekite kondisyon debaz EIA la.

Nu kont sa Proze la dan so totalite lor baz pwin swivan:

1. Proze la reprezant enn invazyon nu vilaz.
2. Proze la kup nu vilaz an de.
3. Promoter la fini servi gro masinn pu ronze e dekap nu flan-montayn la net; li finn fer enn vyolasyon lanatir dan enn fason ki ofans nu memwar Be di Kap.
4. Li fini kareman kokin lasurs; li finn met difil metalik otur lasurs la, met so laponp.
5. Li finn mont enn miray ki ferm akse a lakaz 2yem ranze (kote drwat Proze la kan get later).
6. Li finn konpletman detrir, e anlev ansyin brik taye, depi enn batiman patrimwann, seki ti tom zis par deryer ansyin istasyon lapolis.
7. Li finn kumans demantel istasyon lapolis, enn patrimwann ki dat depi 1905, e ki form parti nu memwar kolektif; li finn anlev laport ek lafnet.
8. Si zame enn tel Proze lotel avek so 74 lo vila ek apartman, plis enn shopping morl, tusala vinn tom omilye nu vilaz, li pu gat atmosfer nu vilaz; dan so siyaz li pu amenn tu kalite problem sosyal grav.
9. Nu kone patron sa zar Proze la prefer pa donn travay dimunn ki res pre. Sa li enn fe. Nu finn truv li dan lezot Proze prekot Be di Kap. Zot pu zis fer sanblan, donn enn-de kontra, pu kuyonn nu; detutfason nu pa ule kondane a enn lavi kot nu ek tu nu zanfann fer travay “intandans”, setadir seki lontan ti apel “servant” pu dimunn ris; nu ule travay produktif, nu ule kree kiksoz.
10. Proze reprezant enn menas a nu akse a lamer, a lonterm; nu fini truv zot vize. Nu finn truve kimanyer finn buz sime laplaz net depi Pte aux Roches.
11. A mwayenn term, Proze la ena lintansyon fer nu kit nu lakaz, ale (dimunn ki res adrwat proze la).
12. A lonterm, Proze la ena lintansyon fer tu dimunn ki lor bor lamer kit lakaz ale (dimunn ki res agos proze la).

Sa proze la, si zame li kontinye, li pu enn presedan pu lezot promoter dan lezot vilaz.

Dayer, asterla nu kone kifer Guvernman finn negliz nu landrwa dan enn fason osi kriyel.

Guvernman pa finn fer naryin pu donn nu sime. Li pa finn fer naryin pu anpes ros grene depi montayn par deryer nu lakaz. Pena drin pu protez nu lakaz depi dilo lapli ki desann gro; ondire Guvernman ule nu sufer kumsa. Li pe anvi fer nu kite, ale. Kumsa li donn patron sekter prive akse a borlamer Be di Kap.

Alor, nu pe fer apel a Guvernman pu:

1. Aret sa proze la deswit.
2. Obliz sa 2 tablisman ki finn ferme, e kot buku dimunn Be di Kap ti travay, setadir Bel Ombre ek St. Felix, pu diversifye zot agrikiltir, pran travayer, e asir bon kondisyon travay. Zot pa kapav zis kontrol later Moris kuma “*real estate*”, e Guvernman permet zot angrese par ogmantasyon valer zot later. Zot ena devwar kree travay lor sa later la. Anmemtan, sa 2 tablisman la bizin met dibut lizinn prezerv prodwi alimanter ki pu plante, pu kree ankor travay. Buku lizinn zonn frans dan Lesid finn ferme, met travayer deor.
3. Devlop lapes an-deor lagon, e repeple lagon, kuma proze Rodrig inn kumans fer. Lamer nepli furni travay akoz li finn sir-explwate.
4. Rann nu nu lasurs, donn nu enn sime, konstrir drin, batir enn sant kominoter, e zardin zanfann. Me, pa zis sa.

Nu demand se: Aret sa Proze la! Obliz proprieter later Moris kree travay dan lagrikiltir ek lapes, liye ar lizinn ki prezerv prodwi alimanter – pu nu prop sekirite alimanter, e pu exportasyon.”

*Siyne par 17 fami Be di Kap, temwayne par LALIT (Rezyonal Lwes) le 24 Mars, 2016.*

## Rol Georges Ah-Yan

Konportman Georges Ah-Yan dan Kozri organize par LALIT ek abitan Baie du Cap ti ase etranz e trakasan.

Dabor, li ti anrezistre Kozri la san dimann permisyon dimunn prezan.

Li ti pran laparol, e finn kareman innyor tem Kozri. Kiryezman li ti amenn so frer ek enn lot manb so lasosyasyon pu asiz lor latab orater ar li.

So diskur ti enn long tirad, dan enn ton agresif e totalman inapropriye. Li ti sirtu exprim so degu, so dekurazan, dan so demars pu sov La Cambuse depi enn promoter lotel. Li dir li finn truv li tuse. Tu lezot dimunn finn kile, li dir, abandonn li. Li finn bizin andet li, li dir, pu li pey avwe. Li ti, anpasan, averti abitan Baie du Cap ki buku aksyon, zot bann “*arrestable offense*”. Li finn menase ki dimunn bizin pre pu fer lagrev lafin – sinon pa vo lapenn. Li ti enn intervansyon byin vyolan. Sel interpretasyon so long zistwar se li pa vo lapenn rantre si u pena deza seki li apel enn “larme”, e si u pa expoz buku danze, e osi buku larzan!

Li ti insilte organizater par dir “Ena zis 20 abitan Baie du Cap prezan,” mem si klerman ti ena enn 50-enn dimunn prezan. Alor, u ti pu krwar avek enn tel konstasyon lor initalite kontiyn fer kiksoz, li ti pu retir li apre so prop intervansyon, al so lakaz avan deba. Anfet, u ti pu krwar ki, avek tu sa det li finn akimile depi zafer La Cambuse, ki li ti pu res lakaz, pa rant dan seki li pe dekrir kuma ankor enn kales kase.

Me, non.

Li finn vini. Li finn reste. E li amenn 2 lezot kontribisyon byin drol.

Premye, li finn ale-mem dimann dimunn Baie du Cap, “Ki zot ule? Ki zot ule? Dir ki zot ule! Zot ule sime? Ki zot ule? Zot ule drin? Ki zot ule?” Kumsa li finn al andeor kad reynion la net. Li ti pretann ki li enn reynion pu donn li, Ah-Yan, kit kontra pu fer abitan gayn kiksoz. Malgre ki abitan finn pran desizyon pu fer kozri ek deba lor *IRS*, kuma *MonRoze*, dan kad tu proze *IRS* ek *Smart City*, Ah-Yan finn insiste pu sey gard li zis, zis lor ki abitan anvi “tire” depi Proze *MonRoze* Baie du Cap. E li fer sa malgre lefet



ki li pa ti mem kone proze la apel “*MonRoze*”. Kan enn dimunn dan lodyans finalman reponn li, “Wi, nu bizin sa bann zafer la, kuma sime ek larivyer”, li frot so lame. Me, Lindsey Collen dimann dimunn ki finn reponn enn klarifikasyon, “Eski u pe tuzur mintenir seki ena dan petisyon?” (kan Ah-Yan ti pe sey fer li reyne petisyon), e sa abitan la finn reponn, avek sazes, “Wi, revandikasyon pu aret proze la, li form parti ladan.” Alor, Ah-Yan finn ale-mem kuma parfwa enn Minis fer kan li anvi asir enn dimunn dan so sirkonskripsyon vinn so azan, ubyin gard so silans, “Ki u ule? Koze! Ki u ule?”

Dezyem intervansyon ti pli drol ankor. Li dir, “Si u pu al delavan” [pa kler ar ki, me klerman ansam ar li], “bizin planifye 12 miting, alarezon Rs7,000 enn,” setadir Rs84,000 [li fini deside pu fer miting, e mem nomb fini deside] “e bizin pare Rs75,000 zis pu demar zafer avwe” [li fini deside par li pu fer ka lakur].

Anplis, dan so intervansyon, li ti agresif dan extrem, li finn pwint ledwa ar dimunn suvan dan enn fason menasan. Li finn dir, “Mo koz ek 2 abitan Baie du Cap, mo fini kone ki ena dan latet tu abitan.” Li insilte dimunn kumsa. E li dir, “Lindsey Collen so diskur byin bon, me li ti bizin al fer li divan etidyan Liniversite Moris.” Ondire dimunn Baie du Cap pa finn konpran!

Swa li finn vinn byin amer. Swa li finn vinn enn veritab menas. Deza, dan lepase, li finn sey postile pu enn syez *Best Loser* kominal. Deza li finn dir piblikman li met buku kandida dan eleksyon zeneral pu li, personelman, gayn buku tan dantenn. Alor, malgre ki li finn kumanse kuma enn aktivist landrwa Mahebourg, li paret anvi rant dan listwar kuma Parti Glob ubyin Parti Malin, ki ti rul pu bondye-kone-kisannla!

## SMART CITIES

### Kanpatron Kozri-Deba

LALIT finn demar enn seri Kozri-Deba lor kestyon kontrol popiler lor later, e an partikilye lor *IRS*, *Gated Communities* ek *Smart Cities*. Ziska ler finn fer sis zoli kozri, avek buku partisipasyon dan Gran Rivyer, Ti Rivyer, Latur Kenig, Baie du Cap, St. Pierre, Camp de Vieux. Nu dimann lekter res an-kontak pu prosenn Kozri-deba. Asire ki u kumans swiv zot partu kot zot ale. Si u anvi organiz enn kot u, fer nu kone.

### KAN PATRON KOZ SMART CITY, KI LI PE KOZE?

Kan patron tablisman koz so *Smart City*, li pa pe vreman koz enn lavil. Li pa pe mem koz kiksoz smart. Li pe koz zafer swivan:

1. Li pe koz spekilasyon lor valer so later.
2. Li pe koz lor Guvernman pu re-rann li tax ki li dwa. Plis remiz tax ankor ki *IRS* ena.
3. Li pe koz lor lavantaz ki li kapav gayne kan li pe rod kliyan pu aste so vila, li kapav promet zot nasyonalite, setadir sitwayennte, apre 2 an, si zot milyarder.
4. Li pe koz enn bann gadjet elektronik ki li pu integre dan so proze, par exanp pu sirveyans ek sekirite.

### KOMYE KOLONIZATER?

Parfwa zot koz lor 30,000 nuvo kolon ki pu vinn instale Moris. Parfwa mem 100,000. Gaetan Siew ti mem koz 150,000 nuvo kolon.

Sa nuvo form kolonizasyon la, li pa pu kuma ansyin kolonizasyon. Li pu plito kuma Israel fer dan Palestinn. Setadir, avek proteksyon lapolis, li al instal enn *Gated Community* omilye pei. Kolon pu res ladan. Lezot dimunn pa pu gayn akse, omwin zot ule fer kas ar u, kuma dan enn Mall. Pu ena enn bann espes loturut ki liye sa bann *Smart Cities*.



# SMART CITIES: KISANNLA SO PLAN?

Kan Guvernman Lepep ti eli, li ti vinn opuvwar san okenn program politik. Li ti pran Guvernman me, san enn plan *ki pu fer*. Alor, sel plan ki Guvernman ena asterla, se pu met an-pratik plan tablisman ek plan lezot kapitalist plito internasyonal.

## Tablisman

Tablisman ti deza ena so plan. So plan prinsipal se pu ogmant valer “so” later, atraver konstrir e vann gro gro sayt lotel, vila IRS, *Gated Communities* ek Smart City, ar milyarder depi deor. Guvernman permet tablisman:

- konverti so later depi later agrikol, fer li vinn komersyal ek rezidansyel. Anplis, Guvernman sed li larzan ki ti li sipoze ramase kuma tax konversyon.
- morsele so later. Anplis, Guvernman donn li larzan ki ti li sipoze peye kuma tax morselman.
- vann so later san pei lanrez-istremman.
- konstrir san pey okenn VAT pu materyo.
- donn investiser permi rezidans permanan apre 2 an.
- donn investiser milyoner ek so fami nasyonalite Morisyin apre 2 an (dan ka Smart City).
- donn nuvo abitan milyarder exanpsyon total Inkom Tax pu 8 an.

Alor, ena Omnicane Airport City ki fek gayn permi pu Smart City – li rule par tu tablisman dan Lesid ki finn amalgame dan Omnicane. Li vedir pran later agrikol, betonn li pu debon.

Plis bann IRS kuma MonRoze Baie du Cap. La, patron tablisman dan enn lalyans ar patron lot pei, pran later agrikol e mem enn but Steyt Lenn, betonn li ar 144 linite lotel, vila, apartman, vande.

Ena Medine Education Hub: Pran later agrikol, betonn li, bayant li.

Ena Azuri dan Lenor: Pran



Desin Georges Grosz

later agrikol, betonn li, bayant li.

ENL Smart City: Otur Bagatelle, pran tu sa devlopman la, fer li vinn enn Smart City. Pran later agrikol, betonn li, bayant li.

## Lezot kapitalist

Fami Jhubboo fek gayn enn transformasyon so IRS an Smart City kot Cap Tamarin.

Chantier de Plaisance fek gayn enn proze Smart City.

## Patron deor

Ena tu kalite Smart City ki ena kuma “driver”, gro gro konpayni deor. Ena miltinasyonal ki ule devlop Port Louis – ena Micro-soft ek Airbus. Ena konpayni Lasinn dan Pailles. Sa finn maldemare, ar ka ICAC pu brayb. Ena konpayn JinFei Richeterre. Sa finn pli mal demare. Tir planter lor later agrikol siper-ris, kit li kumsa depi sipa kan.

## Heritage City: Smart City Guvernman

Minis Bhadain pe rod lonn pu Rs13 milya pu li kree enn nuvo smart city pu Guvernman dan Ebene. Parlman pu demenaze dan enn nuvo batiman, kot pu pey lokasyon pu 15 an. Biro Premye Minis pu demenaze dan enn nuvo batiman laba, kot li osi, li pu pey lokasyon pu 15 an. 8 Minister pu demenaze, pey lokasyon, zot osi. E so sel problem: Personn pa finn explike ki pa bon ar Parlman

existan. Personn pa finn explike kimanyer li enn priorite buz Biro Premye Minis, fek renove pu komye milyon rupi, e lezot Minister ver Ebenn.

Anplis, definisyon enn “lavil kapital”, se kot ena *Seat of Government*, setadir kot Guvernman sitye. Abe, si e Parlman e Biro Premye Minis pe demenaze, li enpe difisil pu krwar Jugnauth kan li dir “Kapital pu re Port Louis”. Li kuma Larenn dan *Alis dan Pey Mervej*, kan li dir, “Abe, bann mo zot ule dir seki mo dir zot ule dir!”

## Konklizyon

Alor, Guvernman Lepep finn kareman kontiyn sa politik ki Jugnauth ek Bérenger ti kumanse avek “Investment Promotion Act” kan zot ti vinn opuvwar an 2000. Ala kimanyer Guvernman apre Guvernman finn fer parey. Me, asterla, li pe vinn sel plan ki zot ena. Sa li reprezant pli gran kriz ki zame Moris finn rantre: Nu ena enn “plan” (smart cities) ki pa reponn a priorite pei. Priorite se kree anlwa anmas, relans prodiksyon agrikol e alimenter, lans lindistri alimenter, lans indistri lapas, batir lakaz pu dimunn mizer. Me, non. Guvernman pe ed sekter prive mont vila pu milyarder depi deor. Guvernman pe ed tablisman fer lor lor valer so later. Guvernman pe sibvansyonn tablisman pu li betonn lager agrikol.

# GUVERNMAN ABANDONN FAMI DAN LOZMAN DANZERE SITE RICHELIEU

Anmemtan ki Guvernman pe depans Rs600 milyon  
pu enn loturut pu liye Smart City Omnicane ar Erport,  
pena okenn konsiderasyon pu lamas dimunn dan Moris ki pe sufer.  
Anmemtan ki Minis Soodhun ansarz 13 Smart City pu milyarder ki pa mem res Moris,  
Minis Soodhun negliz so travay lor lozman dimunn mizer dan Moris.  
Anu get enn lexanp.

Par exanp. Ena 25 fami dan Site Richelieu ki res dan lakaz ki ti konstrir apre enn siklonn dan bann lane 1980, setadir byin apre tu sa santenn lezot lakaz ki ti konstrir kumansman Site dan bann lane '60. Lakaz orizinal la finn tenir tu sa lane la.

Me, par kont, lakaz sa 25 fami la zot ti konstrir san okenn kolonn. Ti servi blok krwaze avek feray pike ladan, feray tro mins. Premye 10-15 an, lakaz la finn tini ase byin.

Me, pandan dernye 10 a 20 an, dusman-dusman tu sa lakaz la finn kumans sede, krake, larg beton depi plafon, e plafon finn kumans kule kuma paste. Lakaz finn vinn byin danzere pu reste. Me, antretan lakaz la fini vande ar dimunn mizer, avek politik "sakenn enn proprieter".

## Lakaz la, so leta?

Tu sa lakaz la ena problem swivan:

- But-but beton tonbe depi plafon dan sak so 4 lasam.
- Feray deor.
- Dimunn finn blese ar but-but beton, finn bizin kud. Beton kontiyn tonbe. Li danzere. Li angwasan.
- Afors lakaz finn sede, ena laport ek lafnet ki pa ferme. Ena laport ki nepli rant dan so ankadreman, ena ankadreman, asontur, ki detase depi miray blok.
- Tu lakaz kule kuma paspire. Dimunn bizin instal kivet ek seo partu dan lakaz kan lapli tonbe, e pu 2-3 zur apre, akoz li kontiyn degute. Dimunn finn

bizin abandonn sertin lasam net. Tu lili kuver ar fey plastik.

- Dimunn finn bizin zet buku zot meb, akoz zot puri kan nepli gayn enn but lasam kot li pa kule pu met zot. Lerla, nuvo meb, asontur, li osi, li gate.

- Dimunn finn bizin ena rekur gard zot linz dan gro sak desbinn kuler nwar, ki lerla fonse dan enn gro desbinn plastik, met kuvertir lor la. Anplas aste enn nuvo larmwar, kan fini perdi otan larmwar, dimunn bizin tret zot prop linz kuma lezot fami tret salte.

- Suvan dimunn perdi tu zot rasyon, akoz li muye kan lapli tonbe. Deza zot mizer, lerla zot diri pu enn mwa parfwa rwine.

- Dimunn malad, ki fek sorti enn loperason kanser, ki asmatik, ki ena epilepsi, zot tu pe sirviv dan enn lasante preker, dan sa kondisyon extreman danzere – pa zis dan gro limidite, me anfet muye.

## Demars

Enn bon parti dimunn ki res dan sa bann lakaz ki finn vinn danzere la, akoz zot ena lemwayin, finn kas lakaz, ranz lot. Alor, samem res ape-pre 25 fami dan sa problem la. Zot finn get Minis apre Minis. Zot finn get Depite apre Depite. Tu demars zot finn seye. Pa naryin mem.

Sa se sirtu fami kot fam sef fami, kot ena zis pansyoner, kot ena enn sef fami malad, kot dimunn swa pena travay ubyin ena travay preker. Zot finn oblize kontiyn res dan sa lakaz la.

## Proprieter?

Dapre politik Guvernman, kot sanse "sakenn vinn enn proprieter", anfet sa bann lakaz la (kuma buku lakaz Moris) zot nepli pu personn. Sa realite la, LALIT finn deza expoz li atraver enn lanket dan 5-6 landrwa, inklir Richelieu. Preske totalite lakaz anfet dan sa sityasyon preker, kuma preske tu lakaz Site Richelieu antye, e buku lakaz Moris an zeneral. Telman li komin, dimunn finn kree enn nuvo mo pu dekrir sa sityasyon legal la. Zot apel li "lakaz zeritye". Sa vedir, lakaz la ti aste par enn kikenn, alepok, e sa kikenn la finn fini mor. Deryer li ti ena 3-4 zeritye, e sakenn finn gayn 2-3 zanf. Alor, enn parti sa laful dimunn ki zeritye la res dan lakaz. Zot pa lokater, alor zot pena drwa lokater. Zot pa proprieter. Alor zot pena drwa proprieter. Nu kone zot pa proprieter pu enn rezon sinp. Zot pa an pozisyon legal pu ni vann lakaz la, servi kas pu aste enn lot, ni pu pran kas prete lor valer lakaz ek later, pu kase-ranze.

Alor, akoz Guvernman finn vann enn lakaz danzere ar zot, zot pe sufer enn kalver.

E, Minis apre Minis finn donn parol pu okip sa sityasyon difisil la, pu dimunn ki pena lemwayin kase-ranze zot mem.

Alor, dimunn dan sa bann lakaz la, atraver 3 abitan Site Richelieu – 2 ladan manb brans LALIT – finn reyni ansam abitan ek Lalit Lwes pu met dibut enn grup *Muvman Lakaz*.

## Soodhun, Minis Lozman okip zis Smart City?

Alor, samem Minis Soodhun ki finn anonse ki li-mem li pu ansarz tule 13 Smart City (nepli enn pu Bhadain, de-trwa pu Lutchmeenaraidoo, 10 pu Tablisman, etc,etc), me tu pu tom, sanse, su Minis Soodhun. Me, li pa kapav mem pran lapenn reponn sa bann fami ki pe truv zot dan otan lapenn dan Cite Richelieu.

Sa donn nu enn lide ki fos rut ki Guvernman apre Guvernman pe pran. Anplas, met kreasyon anplwa, diversifikasyon manyer ki plante lor totalite later Moris, mont lakaz, li finn swazire pu donn patron tablisman permi pu bayant later Moris, e fer enn fortinn lor ogmantasyon valer so later. Anplas depans larzan piblik (nu larzan) lor reparasyon lakaz, e lor konstriksyon nuvo lakaz pu ki tu dimunn viv byin, ki nu truve? Zot tir kas tax ki ti bizin ranpli fon piblik, donn bann gro investiser dan spekilasyon lor valer later. Zot ranz gro-gro sime pu Smart City – par exanp, pu Omnicane, pu JinFei.

*Non a enn plan developman baze lor IRS ek Smart City!*

*Wi a lozman pu tu dimunn!*



Desin Picasso, Talking artist

## ABITAN RICHELIEU:

### OKENN RECONS DEPI MINIS SOODHUN

Le 20 Mars premye grup 8 fami finn avoy  
Minis Lozman Soodhun 2 let. (Get anba)  
3 semenn finn pase, zot pa gayn okenn recons.

Pa mem enn avi resepsyon.

Antretan ankor 5 fami finn siyn samem 2 let la.

Aansam zot finn fer enn “Pwin depres”,  
antan ki Muvman Lakaz, dan Lari Jeanne d’Arc.

Mem zur, ankor 3 fami finn siyn sa 2 let la.

Zot revandikasyon li sinp: Lakaz la pa kapav repare.

Guvernman bizin kase, ranz nuvo.

Zot pe exziz tret zot parey kuma lakaz lamyant.

setadir kase-re-ranze..

### Let individi a Minis Soodhun

Ala kopi let ki sak abitan Site Richelieu ki dan sa problem la finn avoye.

Ser Minis Soodhun,

Mwa ek mo fami abit lakaz Cite Richelieu – pa lakaz ki ti konstrir apre bagar rasyal, me lakaz ki ti mal-konstrir apre enn siklonn enn dizenn lane plitar.

Mo pe ekir u pu explik mo problem grav. Sa bann lakaz ki Guvernman finn plitar vande ar dimunn mizer kuma nu, zot danzere. Zot pena kolonn. Zot pe literalman grene lor nu latet. Problem la finn anpire, anpire, anpire – ziska sityasyon la nepli vivab. Nu ena risk serye pu nu lasante.

Mo pe avoy sa let pu explik mo ka partikilye, e sa let la mars ansam avek mo revandikasyon dan enn “let kolektif” ki mo finn siyne ansam ar lezot abitan dan sa mem problem la.

Mo enn proprieter/lokater/ni proprieter ni lokater me mo res dan enn “lakaz zeritye”.

Pu nu fami, danze nu lakaz prezante, li leswivan: ...

Lakaz la li lor nom ... Li tom mo ...

Reste dan mo lakaz, ena dimunn swivan, e zot reveni (si ena): ...

Salitasion, ... (Siyne)

### Let individi a Minis Soodhun

Misye Minis Lozman, Hon. S. Soodhun,

Nu, abitan lakaz Cite Richelieu ki ti konstrir *apre* ki Cite ti deza existe, e kot laplipar dant nu ni proprieter ni lokater, me res dan ‘lakaz zeritye’, nu pe ekir sa let kolektif la pu inform u ki Guvernman finn vann enn lakaz danzere ar dimunn mizer, e nu pe res dan enn lakaz ki pe afekte nu lasante. Sakenn dant nu finn dekrir danze presi ki nu lakaz reprezante dan enn let individyel. Me, dan tu lakaz problem prinsipal se *pena kolonn* alor lakaz la danzere. Anplis, lakaz kule kuma enn paspire e sa provok tu kalite maladi.

Nu finn pran not ki Guvernman pe lans enn Plan Martial pu sulaz povrete. Nu osi tann dir ki Guvernman pu kas tu lakaz Site ki konstrir avek lamyant akoz li danzere pu lasante, re-ranz lakaz la, mem ki dimunn finn, kuma nu, ‘aste’ zot lakaz.

Alor, nu revandikasyon se ki Guvernman inklir nu lakaz dan sa mem kategori ki lakaz lamyant, setadir kase-reranze.

*Nom ek sinyatir 20 Mars, 2016*

## LALWA SMART CITY DAN KI LINTERE?

Ala ki konsesyon Konpayni Smart City gayne su *Investment Promotion Act* (regyulesyon 128) su Gubernman “Lepep”:

- \* Pena Inkom Tax pu peye pandan 8 an.
- \* Pena tax lanrezistremant ni *land transfer tax* (si propriyeter later-la ena enn kantite aksyon dan konpayni Smart City-la ki ena mem valer, u plis ki later-la).
- \* Ranbursman total VAT ek exanpsyon depi *Customs Duty* pu tu materyo konstruksyon ek finishing (apart meb).
- \* Exanpsyon depi tax morselman.
- \* Pena *land conversion tax* lor batiman non-rezidansyel dan Smart City
- \* Tu permi ek lisans ki zot bizin pu organize par BOI ek *Investment Projects Fast-Track Committee*.

Anplis ki sa, gubernman pe depans par milyon rupi pu infrastruktur kuma ranz sime pu konekte Smart City avek lareopor par ekzanp.

Ala ki konsesyon kapitalis lot pei ki aste lakaz Smart City gayne:

- \* Permi rezidans pu propriyeter lakaz 500,000 dolar u plis, pu so madam u konpayn, so zanfan ek ziska 3 depandan si li pa marye.
- \* Nasyonalitye Morisyin apre 2 an si li met 5 milyon dolar u plis dan enn konpayni anrezistremant Moris.

## LOR SMART CITIES

### KOZRI-DEBA LALIT ST PIERRE

Parmi 6 Kozri-Deba lor Smart Cities ki LALIT finn fer, enn ti Zedi 7 Avril, Kolez Nelson, St Pierre. So tem presi: “*Eski Smart Cities dan lintere Lepep*”. Ti ena enn kinzenn dimunn prezant, parmi ti ena etidyan, travayer ek ti planter legim. Alain Ah Vee, Seetressen Murday ek Rada Kistnasamy ti animater sa renyon ki finn analiz proze Smart Cities ki Gubernman Lepep pe propoze pu inplemante dan pei. Li enn kalite devlopman ki pa dan lintere lamas dimunn, me plito dan lintere kapitalis isi ek lot pei. Deba ki ti ena apre kozri ti konfirm ki sa stil devlopman “Smart Cities” pu anfet antrav tu proze pu asir nu sekirite alimenter e antrav tu proze pu kreasyon lanplwa dirab. Sa proze “Smart Cities” la osi reprezant enn rekolonizasyon Moris avek fasilite ki pe ofer a milyarder depi lezot pei pu vinn etablir Moris avek permi rezidans ek sitwanyennte. Propozisyon LALIT pu devlopman later ek lamer pu prodwir manze pu asir sekirite alimenter li pli smart, kredib e rasyonel pu relev tu bann defi ki Moris pe fer fas. Sa kalite devlopman ki LALIT pe propoze la li pu asir kreasyon lanplwa ek osi lantre deviz atraver devlop lindistri transformasyon ek prezervasyon alimenter pu itilizasyon lokal e pu exportasyon, osi byin ki sekirite alimenter.

*Reportaz SR-RR (Rezyonal Les)*

## LINDISTRI SIKRIYER

### NUVO ATAK KONT KLAS TRAVAYER

Le 11 Desam 2015, Kabine Minis finn apruv rekomandasyon Rapor Landell Mills Commodities (LMC) lor lindistri sikriyer. Sa dezisyon finn vini 7 mwa apre ki finn met enn komite pu inplemant rekomandasyon sa Rapor. Anfet kan li finn sorti, nu finn truve ki li reprezant enn menas pu drwa aki travayer lindistri sikriyer. Detrwa zur apre sa dezisyon Kabine la, le 14 Desam, Minis Agro-Lindistri, Mahen Seeruttun, finn fer enn konferans depres pu anons enn seri mezir anfaver izinye ek planter sa sektor ki an kriz. Li finn anons ankor plis sibsidi lor sak tonn disik depi fon *Sugar Insurance Fund Board*, enn alokasyon Rs20 par lit etanol, enn ogmantasyon lamone bagas ki pu sorti dan fon CEB, re-separasyon MSIRI depi Mauritius Cane Industry Authority dan bi pu resantr resers lor kann ek disik. Parkont, pu travayer dan lindistri sikriyer, Rapor LMC reprezant enn seri atak lor kondisyon travay. Sirtu li ule eliminn tu lakor kot travayer lindistri sikriyer finn reysi gayn enn lavantaz lor seki ena dan lezot lalwa travay, setadir enn re-alinyman lor kondisyon travay baze lor minimam kondisyon ki existe dan lezot sektor travay. Rekomandasyon LMC osi prekoniz amand lalwa pu aboli drwa de grev pu rann li difisil pu travayer fer revandikasyon.

Dan Kabine Minis 28 Mars 2016, Gubernman finn deside pu amand *Sugar Industry Efficiency Act* (SIEA 2001) ek lezot lalwa pu aplik rekomandasyon anti-travayer LMC.

Amandman SIEA ek lezot lalwa (ki tuzur pankor rann piblik) viz pu swadizan “prepar Lindistri Sikriyer” pu “reponn defi ki ena avan 30 Zin 2017” kan Marse Eropein pu liberalize. Li pu osi pran mezir ki pu swadizan “asir viabilite Lindistri Sikriyer alonterm” dan sa lepok kriz. Me anrealite, ankor enn fwa Gubernman Lepep avek konplisite patron pe prepar terin pu shifte fardo kriz dan lindistri sikriyer, met li lor ledo travayer osi byin ki lor ledo lamas dimunn dan Moris.

# PANAMA PAPERS

Anplis kapital finansye miz lor spekilasyon later, kuma dan Smart Cities, li angrese par evit pey tax, e evad tax. Li rod kasyet dan lonbraz “paradi fiskal”, kuma Moris. Afors sa pratik evit tax pe vinn grav, li pe menas lexisans sistem kapitalist net. Alor, fwit e publikasyon *Panama Papers*, li form parti enn stratezi ase meynstriym pu atak sa seksyon kapital finansye dan kasyet dan “tax havens”. Kan sa kapital kumans regularize, kan bann ofshor kumans ferme, lerala pu ena mwins larzan sal pu galup deryer Smart Cities e lezot form spekilasyon.

Kumansman Avril, enn konsortiyom 100 zurnalist ki spesyalize dan fer lanket finn rann publik par enn fwit orkestre enn imans volim dokiman sekre – anfet 11.5 milyon fayl – lor milyarder ek lezot kapitalist ki finn kasyet zot larzan dan “paradi fiskal” kuma Panama ek lezot.

Kan nu dirsa fwit apel “Panama Papers” li ase meynstriym, nu pe dir ki, dapre Wikileaks, li anfet orkestre par Guvernman USA. Fwit paret finn fer par enn lalyans 3 lorganizasyon: *Organized Crime and Corruption Reporting Project* (OCCRP), ki viz Vladimir Putin, sirtu, e ki finans direkteman par US-AID. Li osi finans par ONG pros ar George Soros, ki reprezentant enn lel dan kapital finansye. 3yem ena sa konsortiyom zurnalist ki divan-divan la. Anfet Soros, limem, asontur, li finans lapres komersyal par duzenn milyon dolar. Kan Washington finans sa fwit la, li vedit ena aryer panse ki nu pankor konpran. Me, klerman ena enn lager intern ant diferan seksyon kapital finansye.

Dabor, ki ete enn paradi fiskal? Li tu simpleman enn Ofshor. Li tu simpleman enn paradi pu dimunn ris ki pa ule pey tax. Ena enn gran paradi kumsa dan Panama.

Ena osi dan plizir lil Britanik – Virgin Islands, Guernsey, Jersey – ek ena ofshor dan pei kuma Moris, Sesel, etc.



Desin Adrian Hill, Abstract Design

Tutswit apre publikasyon Panama Papers, Premye Minis Laisland finn demisyone. Answit so Guvernman net finn demisyone. Akoz zot lyan ar “paradi tax” devwale dan Panama Papers. Guvernman USA finn lans enn lanket kriminel. Minis Lindistri dan Leslpayn fini demisyone akoz so nom ti mansyone. Ariv le 15 Avril, 2016 G20 finn dir zot pu partaz informasyon ant zot lor kisannla proprieter “shell companies” (konpayni lakok, kuma ena par santenn dan Ofshor Moris). Linyon Lerop inn anonse ki li ena lintansyon fors gro multinasyonal deklar zot avwar ek zot reveni e pey zot tax kuma bizin. David Cameron ti su presyon pu ofer so demisyon. Dan Moris, ena de-trwa kapitalist ki zot nom figure, isi-laba.

Me, publikasyon *Panama Papers*, li reprezentant enn kontradiksyon dan sistem kapitalist.

Si zis klas travayer pey tax, pu ena rebelyon kont sistem. Ala kifer ena reaksyon depi alinteryer sistem la. Sa fwit dokiman la, li pa parey kuma fwit par Julian Assange. Li li dan “house arrest” dan Lond. Sa 100 zurnalist la, zot plito ero, pa zis pu nu kuma

Julian Assange ete, me pu klas kapitalist *dan so lansanb*.

Mem si kapital finansye finn vinn o-puvwar, e mem si li dominn tu lezot form kapitalist zordi, li pa pe futi reprezentant lintere totalite bann kapitalist. E pu kapitalism res stab, so Leta oblize.

Anu explike.

Klas kapitalist li divize an diferan seksyon, depandan kot li investi. Seki ena kapital dan lindistri minn, zot apel kapital minyer, seki dan lagrikiltir kuma tablisman, zot kapital agrikol. Seki dan lindistri, zot apel kapital indistriyel. E seki apel “kapital finansye”, ki finn vinn opuvwar lor lezot kapitalist, li, li dan sekter labank, lasirans, fer zugader lor valer diferan metal ubyin pyer presye, seki miz lor sanzman dan to desanz, seki aste prodwi apel “futures” (par exanp, rekolt may an 2018!), ubyin dan imobilye (spekilasyon later), ubyin seki aste prodwi finansye ki fer “hedging”, setadir miz lor sanzman valer enn prodwi dan lavenir.

Li enn form kapital partikilyerman fupamal. Li siper-egoist. Li san skripil. Li san okenn fondman sosyal. E, limem ki opuvwar. Me, kan li telman debride, li pe menas lexisans sistem kapitalist. Alor, ena enn muv depi kapitalist tu bor – inklir enn parti inpe mwinn oto-santre parmi kapitalist finansye – pu met enpe lord.

Me, “leta burzwa”, li bizin asir 2 zafer minimem pu li res o-puvwar:

- Leta bizin reprezentant lintere tu seksyon kapitalist. Li pa kapav reprezentant zis kapital finansye. Li pa pu stab ditu.

- Leta li bizin fer ase konsesyon a klas travayer pu ki evit rebelyon.

Alor, Leta Britanik ti pe deza sey ramenn konpayni Amerikin

## SO DAT EXPIRASYON PE ARIVE?

kuma Google, Starbucks, Netflix, Amazon a-lord, fors zot pey zot tax. Anfet an 2013, *Daily Mail* ti anonse ki 1 lor 4 firm ki opere dan UK pa pey tax ditu. Sa evazyon tax, li pe vinn enn menas pu stabilite sistem kapitalist.

Anmemtan, li pe osi permet investisman depi pei kuma USA glise, ale, kit depi pei, al aterir dan Lasinn, Lend, Vietnam. Sa fwit kapital, ek sa evazyon tax, pe permet lamonte 3 kandida dan Primaries USA ki napa form parti dan establishmennt ki kapitalist dan so lansanb kontrole. Adrwat ena e Ted Cruz e Donald Trump, ki finn gayn popilarite sirtu lor kestyon fwit kapital depi USA, vizavi Marco Rubio, kandida meynstriym Repiblikin. Agos, ena Bernie Sanders enn awtsayder ki reprezant inkarnasyon politik sa muvman "Occupy Wall Street" e ki pe frol gayne kont Hilary Clinton, enn kandida meynstriym Parti Demokrat.

Alor, lansanb klas kapitalist pe sey kontrol gurmandiz ek amoralite so seksyon dominan, setadir kapital finansye.

Li pa fasil, parski sa seksyon kapital la, fini vinn pli for ki Leta.

Kumsa ki enn volonte fasizant kumans leve. Dimunn ule enn Leta ki kapav met lord ar kapitalis. Me, enn tel Let ainteryer sistem kapitalist, san enn veritab revolisyon lamas dimunn ki ranvers sistem kapitalist anmemtan, li pu enn Leta Fasist. Samem li manyer ki Hitler monte dan Lalmayn, kan kapital finansye ti o-puvwar pu premye fwa.

Me, e la li inportan pu nu dan LALIT, li dan enn tel moman ki volonte sosyalist, li osi, kumans pran nesans, kumans so krwasans. Me, sa li buku travay. Pena sime kupe. Fode tu sa puvwar konsantre dan lame kapitalist, e sirtu dan lame kapitalist finansye, li bizin vinn dan lame lepep – pa zis enn Leta burzwa ki refer limem.

Eleksyon Zeneral Desam 2014, *Lalyans Lepep* ti eli. Ki ena dan Lalyans? MSM, PMSD (ki ti i dan Guvernman PT ziska lavey Eleksyon Zeneral), ML (enn but dan MMM ki pa ti dakor avek Lalyans PTr-MMM lavey eleksyon zeneral). Zot pran puvwar avek enn gran mazorite.

Li ti plito enn eleksyon kot lamas dimunn ti ule demerd li de enn guvernman. Lepep ti vreman plin apre 10 an abi puvwar Parti Travayist. Rezim Travayist ti pe ronze par tu kalite skandal. Puritir ti byin, byin avanse. Telman ti ena skandal, ki mem si li ti ena volonte, ansyin guvernman PT-PMSD pa ti ditu an mezir vinn avek enn program ki ti nesaser, setadir pu kree lanplwa masif pu reponn a problem somaz ek travay preker. Li pa ti fer naryin pu regle problem irzan lozman. Anfet, PT-PMSD pa ti ena okenn volonte politik pu vinn avek enn stratezi devlopman anfaver lamas dimunn fas a kriz sistemik. Li finn plito swazir enn stratezi devlopman ki finn fer klas travayer, lamas dimunn mizer sarye fardo sa kriz la. Sa explik kifer lamas dimunn ti ule demerd li de sa ansyin rezim la.

MSM, li, li finn vinn kolmat enn lalyans, *Lalyans Lepep*, kolmat enn program vit-vit. Telman Lalyans PT-MMM ti inpopiler, ki MSM avek so *Lalyans Lepep* pran guvernman avek enn mazorite konfortab.

### Alternans?

Apenn, enn banane inn pase. Inkoerans dan guvernman MSM- PMSD- ML dezenere, vinn instabilite. Pa finn pran buku letan pu ki skandal ek puritir sa sistem an kriz angluti Minis apre Minis.

Guvernman Lalyans Lepep finn nek reprezant enn sanzman *dimunn* dan guvernman, enn "alternans" alatet Leta, san

okenn stratezi ekonomik apar stratezi tablisman. E sirtu pena enn stratezi devlopman koeran pu fer fas a kriz sistemik. *Guverman Lepep*, pe swiv mem politik ekonomik ki Guvernman PT-PMSD, enn politik ekonomik ki finalman swiv dikta kapital finansye, setadir spekilasyon latter, ofshor, avek rezilta ki li osi li an kriz. Sa kriz politik li enn leko kriz dan sistem kapitalism.

Alternans ki Guvernman *Lalyans Lepep* ti reprezante, dan enn lepok kot ena pu zer enn sistem ekonomik an kriz, dan byin tigit letan inn vinn expoz so limit. Alternans pa sifi. Enn program kolmate pu zer sistem patron ki an kriz pa sifi.

Selman enn program kler ki chalennj sa sistem patron ki pu amenn sanzman pozitif. Sa kalite program la li bizin kree par klas travayer ek lamas dimunn, ansam ek enn parti kuma Lalit. Parti la pa kapav kree li, tusel. Kumsa klas travayer ek lamas planter, peser, somer, elver, kapav defann program la. Li pa zis dan zot lintere, me zot pu'n partisip dan kree li.

Setadir fode ena enn program politik ki ena potansyel pu kree lanplwa masif. Sa anplwa an gran nomb bizin dan bon kondisyon travay. Sa program la bizin adres problem lakaz. Li bizin viz sekirite alimanter pu lepep. Se anfaver sa kalite program ki LALIT pe milite.

Anfet si nu fye zis lor "alternans", nu reprodire mem puritir PT-PMSD ansyin rezim. Get dan lespas mwins ki 18 mwa, komye Minis deza an kriz. Ena 2 fini demisyone. Ena lezot ki Premye Minis inn ras zot Minister. Enn ta pe pas divan ICAC. Zot tu pe lager sat-lisyin. Responsabilite kolektif Kabine, enn pilye leta burzwa, finn eklate. Sekre Kabine osi. Kriz la pe mem depas Kabine, me anu get zis dan Kabine. Anu get skandal Minis par Minis:

## ANEEROOD JUGNAUTH:

Depi ki Aneerood Jugnauth Premye Minis, plizir fwa li finn azir san okenn prinsip.

**“Enn Bato pe kule, mo sov mo lapo!”**

Kan li ena linformasyon ki la-bank Bramer pe al fayit li swazir pu tir so kas tranquil. Ala seki li ena pu dir lorla (*lexpress.mu*, Zin 2015):

*“Abe ki mo rann mwakouyon? Mo less mo kass laba mem? Premie zafer, monn tir mo kass. Enn bato pe koule, mo sov mo la po.”*

Alor pu Aneerood Jugnauth li normal pu servi linformasyon ki li ena antan ki Premye Minis pu sov so kas avantu. So lintere personel pas avan. Pu li pena okenn problem si lezot eparnyan perdi zot kas purvi li pa perdi pu li. Li finn mem expoz so mepri pu lepep ek so prop fami, kan li azute dan mem lartik: *“Pa zis lepep, ena boukou mo bann fami inn fou larzan ladan.”*

**Ka kont li pu dub-lapey**

Aneerood Jugnauth pa ezite pu kontiyn tus so pansyon antan ki exprezidan Repiblik e anmemtan so lapey kuma Premye Minis. Alor ki dapre *President’s Emoluments and Pension Act*, ki Jugnauth limem ti fer vote an 1992, li spesifye ki enn Prezidan ubyin Vis Prezidan an retret pena drwa exers enn lot travay pu enn lapey ziska lafin so lavi. Ala seki seksyon 4(2) sa lalwa dir : *A retiring President or Vice-President in receipt of a pension under subsection (1) shall not undertake any remunerative employment during the remainder of his life.* Kan Akil Biss-essur met enn ka lakur lor baz sa lalwa la, Jugnauth dan so defans vinn mem zistifye lefet ki li pe kontiyn tus so pansyon ansyin Prezidan parski, li dir, fonksyon P.M. *“pa enn anlwa reminere”*.

**Rod faver U.K.**

Sa fason azir san prinsip depi Aneerood Jugnauth li pa nuvo.

Arsiv Britanik ki fek deklasifye finn devwale kimanyer kan li ti fek vinn Premye Minis an 1982, zis kat mwa apre, li fer enn reket ofisyel ar Premye Minis Britanik pu ki so tifi Shalini ek so zann Krishan Malhotra gayn permi rezidansyel dan UK. E sa malgre ki Leta Britanik anger avek Moris lor kestyon lokipasyon militer Chagos ek Diego. Sa demars Aneerood Jugnauth pu enn lavantaz pu so prop fami kwinsid dan mem lepok kot antan ki Premye Minis li ti refiz sistematikman pu donn dimunn ki ena dub nasyonalite, kuma Paul Orian, permi rezidans Moris.

**Servi letterhead ofisyel Prezidan**

Parey kan li ti Prezidan li finn deza servi so letterhead ofisyel pu tir enn kominike pu anonse ki so frer, Ashok Jugnauth, ki ti manb so prop parti, MSM, anfet zis so *“demi-frer”*.

**Pa denons konplo ek mansonz Thierry Henry**

Dan ka aksidan ki PPS Thierry Henry inplike, kot enn pyeton finn trov lamor, Aneerood Jugnauth dan Lasanble Nasyonal deklare ki li pena pu dimann so PPS demisyone. Li permet li afirme ki pyeton la finn inpridan me li pa trov nanye pu dir lor lefet ki Thierry Henry finn koz manti ar lapolis e fer konplo ar so madam. Jugnauth pa trov li grav ki so PPS finn konplote pu fer kover-ep dan enn aksidan kot dimunn finn mor.

**Kont langaz lepep**

Pli resaman Aneerood Jugnauth finn montre tu so mepri, so dub langaz, so latitid represif kont langaz Kreol kan li finn deklare dan Parlman ki *“tank ki li la, lang Kreol pa pu rant dan Parlman”*. Anmemtan, so Chief Whip dir piblikman ki li anfavor. Plizir lezot depite, zot osi.

**INSTABILITE STRIKTIREL PRAVIND v. ANEEROOD**

*“Lexekitif”*, sa but leta burzwa ki sipoze *“guverne”* finn vinn kompletman instab apre eleksyon 2014. Sa pe amenn kriz apre kriz onivo politik. Sa instabilite la dekul an gran parti depi derayman stratezi politik MSM, e *Lalyans Lepep* an antye. Zot plan sete ki Aneerood Jugnauth ti sipoze kit so pos Premye Minis, sed plas ar Pravind Jugnauth. Me, sa pa finn kapav met an-plas. Aneerood Jugnauth finn res la, ansarz Kabine Minis. Anplis, Aneerood Jugnauth, li *andeor* MSM; li sapot Lalyans Lepep, me li pa al dan reynion MSM dan Sun Trust. E se Pravind Jugnauth ki lider MSM.


Akoz zizman lakur kumkwa Pravind Jugnauth kupab pu konfli dintere su lalwa POCA kan li finn siyn papye pu lavant Medpoint, sa hennding over-la pa finn arive. Apre zizman, Pravind Jugnauth finn swazir pu demisyone kom Minis, fer lapel. Vedir an-atandan lapel, li res enn sinp depite. Li nepli kapav syez dan Kabine Minis. Alor li nepli mem form parti brans lexekitif leta.

An-atandan konklizyon lapel, MSM ek guvernman pena lot swa apart asime ki Pravind Jugnauth pu gayn so lapel ek pu vinn Premye Minis dan enn lavenir pros e Premye Minis Aneerood Jugnauth sipoze pe prepare pu kit so pos. Me, larealite pa sa.

Sa finn byin vit amenn konfli striktirel. Par exanp, kan Premye Minis Aneerood Jugnauth finn insilte Menon Murday lor baz de klas e pa finn nom li Vis Prezidan, Pravind Jugnauth finn anbarase antan ki lider MSM. Li finn bizin dir bann pro-Murday dan rezyonal MSM ki Premye Minis *“mal informe”* lor Menon Murday.

Byin vit, sa finn depas staz *“lanbara”* dan enn sityasyon kot ena konfli uver ant diferan Minis dan guvernman; konfli ki

dan enn gran mezir dekul depi sa instabilite kot lider MSM ek Premye Minis pa mem dimunn. Kisannla sipoze transe kan ena konfli ant diferan Minis dan guvernman? Dapre prinsip leta burzwa, li sipoze Premye Minis.



2 fason gete

Purtan, kan Lutchmeenaraidoo ek Bhadain gayn lager, e Lutchmeenaraidoo ti pe menas demisyone dan Parlman, provok enn parsyel, se lider MSM Pravind Jugnauth ki al negosye ar Lutchmeenaraidoo pu pa fer sa. Sa finn amenn Lutchmeenaraidoo, ki ti Minis “mirak ekonomik” abandonn sa rol la, al fini dan Minister Zafer Etranzer plito. Remarke ki Bhadain osi finn perdi terin dan sa remaniman la: li finn perdi portfey ICT (ki Pravind Jugnauth ti pe okipe avan), kontrol lor MBC ek ICTA. Eski Aneerood ubyin Pravind ti pe rod tay so kart?

Kan Premye Minis Aneerood Jugnauth finn fors Dayal demisyone kom Minis, apre redifizyon lanrezistremman lor tu radyo, lider MSM Pravind Jugnauth finn kontiyn proklame ki MSM solider avek so manb Dayal. Kan Premye Minis anonse ki li nepli kapa “kont lor” Lutchmeenaraidoo, lider MSM dir ki Lutchmeenaraidoo ankor kapav “kont lor” sutyin MSM. Rapel ki kontrerman a Aneerood Jugnauth, Lutchmeenaraidoo finn re-rant manb MSM.

Sa problem striktirel grav finn provok buku spekilasyon lor ki kantite Aneerood Jugnauth izole dan Guvernman. Sa izolasyon la, asontur, pe rann Guvernman-la ankor plis instab.

## LUTCHMEENARAIDOO

Vishnu Lutchmeenaraidoo ek Roshi Bhadain finn rant dan enn lager piblik, setadir tulde finn al an-kont “responsabilite kolektif” sistem Kabine. Roshi Bhadain ti kumanse par dir li pa dakor ek Maubank, ki Guvernman inn met dibut.

Anfet, sa nuvo Minister ki Bhadain okipe, li finn ena de lefe destabiliz Leta burzwa aktyel:

- Li finn devid Minister Finans par tir so laspe “finans” ar Minister la net. E sa dan enn lepok kot kapital finansye finn reysi dominn lezot seksyon kapital.

- Li finn donn enn zenn minis byin anbisye enn rol, antan ki Good Governance pu vinn vey tu lezot Minis, sanki lezot Minis ena drwa resiprok.

Alor, li paret ki Lutchmeenaraidoo pe akiz Minis Bhadain organiz fwit dan lapres lor so lonn. E, li pa inposib ki dimunn pros ar Bhadain finn fer sa. Dayer, Bhadain krwar sa so rol antan ki ansarz “integrity” dapre so nuvo lalwa.

### Dosye

Otur Vishnu Lutchmeenaraidoo ena problem swivan:

1. Li finn tir enn affidavit kont enn lot Minis dan Guvernman, setadir li finn avoy promne “responsabilite kolektif” enn pilye leta burzwa.
2. Li finn apel Bhadain enn KGB, setadir enn dimunn ki, kuma Stalin, rod eliminn so bann kamarad.
3. Li finn pran enn lonn avek SBM, ki ti tom su li antan ki Minis Finans.
4. Li finn, antanki individi, me osi Minis Finans, rant dan enn travay spekilasyon lor valer lor. Sa donn li enn vested interest dan lor.
5. Ena lezot aksyon ki viz li ek so fami – kote lonn, e kote koripsyon – ki ICAC finn rebran.

## BHADHAIN

### “Calife a la place du calife”?

Si ena enn nom ki dan labus preske tu dimunn dan Moris, depi eleksyon Desam 2014, se byen Roshi Bhadhain. Enn dimunn ki finn ena parkur ek asansyon ase filgiran dan nuvo Guvernman SAJ/*Lalyans Lepep* depi ki zot finn eli. Sirtu kan nu tu kone ki Roshi Bhadhain pa enn dimunn ki ena enn long lexperyans politik deryer li.

Alor ki dan kumansman, dimunn ti trov Bhadhain kuma enn gran Zoro lokal sirtu kan li finn demantle lanpir BAI e pran kanpayn netwayaz *Lalyans Lepep* dan so lame, zordi nu kapav dir ki persepsyon popilasyon Moris lor li finn ase sanze. Dan tigit letan, nu finn asiste a transformasyon M. Bhadhain depi Zoro an Iznogoud; savedir enn dimunn ki swaf puvwar ek kontrol e ki ena dan so liyn-demir plas fitir PM. Sa dezilizyon ki M. Bhadhain finn kree limem, nu trov so lasurs dan so bann diferan aksyon “politik” ki li finn fer depi ki li Minis Bonn Guvernans ek Servis Finansye. Me petet, se ki pli grav se ki Roshi Bhadhain finn kree bann zafer ki ase nuvo, dan sans negatif, dan pei:

So konfli avek DPP ek so bann latak insesan kont li finn byen bulvers e guvernman e zidisyer. Finn ena enn kanpayn monte kont DPP, ki finn mem kalifye de mons ek tro pros ar PTR aköz so lyen de parente avek Arvind Boolell. Li premye fwa ki enn minis Guvernman pe met ankoz inpartyalite DPP zis aköz so lider dan enn take zidisyer. A tel poin, ki li dir ki biro DPP bizin vinn su so gran kamarad Attorney General ek pa res independan!

- *Manyer ki li finn, e pe, servi ICAC kont so prop koleg.* Vishnu Lutchmeenaraidoo finn kalifye enn tel travay de “KGB”. Anfet, li kler, kan ou trov manner ki



ICAC pe ankete, li ase trakasan. Kan li uver lanket lor DPP, lor Vishnu Lutchmeenaraidoo, lor Dayal, etc, li paret ki ena enn sertin manipilasyon politik, omwin lor so tayming, me antuka, kitpar, ki, a sontur, kontribiye pu kree enn sitiasyon kot nepli ena responsabilite kolektif dan Kabine. Purtan, sa li enn pilye demokrasi burzwa.

- *Fason ki solidarite ministeryel finn kase.* U ena enn Minis Bonn Guvernans ki pe paret fer bann lanket, su tapi, lor so bann koleg ki asiz ar li dan Kabine Minis, dan Parlman, dan biro politik, etc, etc. Normal sa pu kree enn sertin mefyans. Anplis, kan sa bann lanket su tapi la pran enn lanpler plis piblik (par “fwit” dan lapres), li enn koleg ki pe atak enn lot koleg, alor kot pu ena solidarite ministeryel? Eski M. Bhadain pa pe dinamit so prop parti? Ubyen li tro akro puvwar ki li pe gayne par sa pos kot li ansarz cheke lor lezot dimunn/institiison?

Dan enn kontex politik byen kompleks kot u ena enn PM ki pa lider so prop parti e kot lider ofisyel parti pa pe kapav zwe so rol kuma bizin parski li ena enn kes lakur, u gayn enn dimunn kuma M. Bhadhain ki pe zwe lor 2 fron. Rapel ki o debi, li ti byen pros avek so lider me apre kinn arive? Zordi, u truv dan lapres, ki ena dimunn pe kalifye M. Bhadain de “zeritye politik SAJ” a tel pwin ki li paret pe mem ena konfli ant SAJ ek Pravind lor kestyon M. Lutchmeenaraidoo ek Bhadhain. Kestyon ki poze, zordi, se lor ki fron Bhadhain pu desid pu zwe si zame ena enn zizman pozitif dan kes Pravind Jugnauth? Eski li pu resi, a lon term, vinn “*calife à la place du calife*”?

### Dan Larisi

Minis Bhadain pa finn al Larisi pu etidye bann metod KGB, kuma Minis Lutchmeenaraidoo pe rod fer nu krwar: li finn al St. Petersburg dan Larisi pu asiste enn konferans. Me li finn profit

lokazyon kan li laba pu fer enn latak anfantin kont DPP Satyajit Boolell.



Dan so intervansyon dan sa konferans la, li finn explike ki manyer Moris ena enn problem parski DPP so frer enn dirizan dan Parti Travayis ki dan lopoziyon. Alor li finn rakonte dan so diskur dan sa konferans internasyonal ki ansyen Premye Minis Ramgoolam ena lanket lapolis lor li, ek se DPP ki pu bizin deside si pu anvoy kes lakur. Lerla li finn ponn enn enormite extraordinar: li dir ki si DPP desid pu purswiv, dimunn pu dir ki li ule fer ferm Ramgoolam pu ki so frer Arvin vinn lider Travayis; e si li desid pu pa purswiv, dimunn pu dir ki se aköz li pe protez lider parti dan lekel so frer etc.

Bann lezot partisipan dan sa konferans internasyonal devet finn inpe abazurdi ek sa lozik la. Ala kiltir politik Bhadain, enn minis “byen an vu” dan guvernman Aneerood Jugnauth!

## RAJ DAYAL

Raj Dayal pa finn zis anonse li pu plant 2 milyar pye, li pa finn zis al promne partu dan elikopter lapolis, li pa finn zis organiz reynion dan Kazern, me li pe bizin reponn lor enn anrezistremans kot li sipoze pe dimann enn promoter larzan an-esanz pu siyn enn EIA (*Environment Impact Assessment*) pu enn proze dan Gro Kayu. Li finn bizin demisyone kuma Minis. Li pe reponn enn akizasyon su ICAC. Anfet, Premye Minis, ki ena akse a plis liformasyon ki sitwayin ordinar, finn azir; li finn dimann Lutchmeenaraidoo step down.

Asontur, sa kalite akizasyon la pe rann kredibilite bann EIA (avan ek apre) byin feb.

## SOODHUN

Ena plizir fason ki Soodhun finn anbaras nuvo Guvernman Lepep.

### Klinik Appollo

An Fevriye 2016, lapolis al aret enn internet aköz li ti poste enn bil Klinik Apollo lor ininternet. Plitar nu tu aprann ki petet Minis Soodhun dwa Klinik Apollo; si wi, eski li finn regle so det? Ziska zordi, nu pena enn repons kler. Purtan li sinp, Minis Soodhun nek ena pu dir laverite. Fini lamem.

M. Soodhun prefer pu al met depozisyon lapolis kont M. Ruhomally aköz li ti sipozeman poste lor *Facebook* enn fos bil Klinik Apollo Rs396,176 lor nom M. Soodhun, e kot fer mansyon ki Bord Klinik finn “*write off*” sa det la. CCID aret Misye ek Madam Ruhomally. M. Ruhomally arete de fwa.

Minis Soodhun finn fer konferans de pres, tir kominike, pu dir ki li pa finn al klinik an 2014.

Lagazet *L'Express* pibliye enn bil Klinik Apollo pu exaktman mem som pu tretman ki M. Soodhun ti fer, me an Ut 2010.

Ziska zordi, Minsi Soodhun pa finn eklersi nu, eski li finn deza ena enn det avek Klinik Apollo e si wi, eski sa det la finn reye ubyin eski li finn peye? Soodhun finn deklare ki li pu retir so plint.

### Larabi Saudit

Sa lane la, Misye Soodhun inn al Larabi Saudit plizyer fwa. Ena, ti bann vizit deta e ena, ti bann vizit prive.

Seki sok dimunn, kimanyer enn Minis ki lor enn vizit prive, kapav al partisip dan enn defile militer Larabi Saudit? Sirtu dan lepok kot Larabi Saudit pe sibir buku kritik pu bombardman Yemen e so rol dan konfli militer dan larezyon. Kimanyer enn Minis, kapav pran pozisyon avek Larme Larabi Saudit dan enn konfli arme kot Leta Moris pa finn pran pozisyon? Pena okenn koreksyon de sa fopa depi Leta Moris.

Lor enn lot vizit prive, li al fer negosyasyon deta pu uver enn Lanbasad Moris dan Larabi Saudit. Anplis M. Soodhun, li Minis Lozman. Li pa Minis Zafer Etranzer. Kifer li ki al fer demars pu uver lanbasad?

### Islamic Affairs ?

Kimanyer li gayn tit Minis "Islamic Affairs"? Pena okenn rektifikasyon ni depi Soodhun, ni depi Leta.

### Esklav SAJ

Semenn dernye, pu explike ki pa finn demisyone kuma Minis, Soodhun dir «*travay esclav pou SAJ lanwit ek lizour, mem si li bat mwa, li zour mwa, maltret mwa*».

### Later Grand Baie

Ena enn polemik otur transaksyon enn terin avek Pa Zeometrik dan Grand Baie ki implik Minis Soodhun ek Zouberr Joomaye, depite MMM.

---

## GAYAN

Ena dimunn, kuma zot uver zot labus, u fini tini u ku akoz u kone tut sort betiz e konnri kapav sorti. Pu dimunn ordiner, nu fini abitye ki sa riske implik inpe malez sosyal, se tu. Me kan ena dimunn opuvwar ki koz kumsa ek azir lor zot parol, u bizin trakase. Anil Gayan, li enn parmi sa kalite dimunn-la. E pa depi aster. Lafin bann lane '80, kan li ti prezidan Bar Council, Gayan ti dir piblikman ki fale pa fam gayn drwa vinn ziri lakur akoz fam gayn reg tulemwa, ek sa dapre li, kapav afekte zot zizman. Sa ti sulev enn tole alepok. Erezman li ti res Prezidan Bar Council zis 2 an.

### "Government se guvernman"

Depi Anil Gayan Minis Lasante dan guvernman Lepep, li fini vinn enn pwa lur pu so parti Muvman Liberater ek pu guvernman-la. Deza ena 3 lanket *Equal Opportunities Commission* kont li kot li pe bizin vinn explike kimanyer finn nom enn so

bann pros, Vijaya Sumputh, kom direktis *Trust Fund for Specialised Medical Care* ek kom manb bord *Mauritius Post and Cooperative Bank*. Avan ki EOC fer lanket, Anil Gayan finn fini fer deklarasyon dan Parlman pu explik sa nominasyon-la. "*Guvernman, se guvernman. Se guvernman ki deside*" li finn dir. Ramgoolam ti kapav dir mem zafer pu explik manyer Madam Soornack ek Gooljaury finn gayn enn seri faver su so guvernman.

### Danze so politik lor ladrog

Pli grav ankor, se manyer ki Gayan pe sistematikman atak Program Metadonn ek esanz sering, enn program ki finn reelman ede pu sulaz sufrans viktim ladrog ek zot fami. Anmemtan li finn diminye vol ek vyolans liye avek dezesperasyon adik ladrog pu rod larzan pu gayn zot prosenn doz. Sa finn akonpayne par atak sistematik kont bann lorganizasyon ki ena plis lexpertyans pu diyl avek problem ladrog. Dayer, li fek anons fermtir NATReSA (*National Agency for the Treatment and Rehabilitation of Substance Abusers*).

Li ti deza devwal so mepri pu adik ladrog kan apre eleksyon, li ti deklare piblikman ki Rajesh Bhagwan finn eli par 400 vwa, "Samem kan monn vinn Minis Lasante monn met tu metadonn deor". Dan Parlman, premye fwa kan poz li kekyon lor ki resers li finn baz li pu li aret program distribisyon metadonn, li finn reponn ki li finn baz li lor enn serch Google. So linyorans lor problem ladrog ek so lefe lor lasosyete finn amenn Gayan favoriz enn politik pu fors "sevraz" lor adik dan lespas 6 mwa, plito ki enn program ki ena swivi lor letan pu adik pa abandonn program-la ek re-tom dan marse nwar. Sa lapros Minis Gayan paret pe kumans ena move lefe lor problem ladrog. Sinyal ki Minis Gayan pe avoye se pu diminye doz metadonn

brit. Sa kalite sinyal-la kapav kree telman angwas ki adik kit program-la net. Deza dimunn pe remark ogmantasyon dan kantite vol ek vyolans dan plizyer landrwa amezir adik retom dan marse nwar mafya ladrog.

---

## GUNGAH

Minis Komers ek Lindistri, Ashit Gungah finn implike dan skandal horspawer. Sa loto BMW 2000cc inn deklare kuma 1500cc an Zanvye 2011 kan li ti ankor lor nom Minis la. Lr ti pe pey Rs3,500 deklarasyon par an anplas Rs10,500 ki ti oredi peye pu sa gro loto la. Kan lapolis finn aret li, li finn dir ki loto ti fini vande ar kurtye an 2010, me antan ki proprieter li pa finn inform NTA de sa lavant la. Donk li enn lavant papye blan, ki ilegal dapre lalwa.

Par kwinsidans, mem moman kot Gungah implike dan sa trafik horspawer, finn ena sanzman dan lapolis. Serintandan Daniel Monvoisin finn nome pu diriz lanket anplas Hector Tuyau. Pli kle, Guvernman finn amnestye tu proprieter ki spesifikasyon zot loto pa koresponn avek seki ena lor Horspawer.

---

## HENRY

PPS Thierry Henry pa zis responsab enn aksidan grav kot finn fer enn viktim le 3 Avril, me li finn osi implike dan mansonz pu fer krwar ki li pa ti pe kondire sa moman la, me plito so fam. Enn loto Leta implike.

Henry finn reaparet plis ki 20 ertan apre aksidan, pu dir limem ti pe kondwir. Li finn arete, large lor kosyon lor sarz omisid involonter e pu refiz alkotest. Sarz konplo, kote?

Aneerood Jugnauth dir Henry pa bizin demisyone kuma PPS. Li al pli lwin, li dir dan Parlman komkwa li finn anprann ki viktim la antor dan sa aksidan la akoz li finn travers sime divan loto PPS Thierry Henry.

# 12 PWIN PU GID NU, BANN SOSYALIST

Zordi nu dan enn lepok kot sanzman kapav kumans vinn vit.  
 Li kapav sanzman dan bon direksyon, kuma li kapav dan move direksyon.  
 Alor, li enn moman pu nu kumans re-fit nu analiz.  
 Li enn moman kot nu gete ansam kimanyer sanzman ena tandans arive.

## 1. Ena prinsipalman 2 klas dimunn dan tu pei, inklir Republik Moris:

Malgre tu varyasyon dan sosyete, anfet ena 2 klas (kategori) dimunn. Enn ti nomb ki zot posed, kontrol e okip preske tu kapital dan labank, stok exchennj, later, masinnri, e ki finn, pandan dernye 10,000 an lexisans limanite, depozed lamas dimunn, lasas nu depi bul later nurisyer, expropriye seki nu prodir par nu travay. Sa li enn kote. Zot ki desid kotsa pu met ki lizinn, ki matyer brit pu explwate, ki pu plante lor later, ki pu fer ar larzan dan labank, etc, e zot osi deside dan ki sekter pu pran dimunn pu travay, e komye. Anfet dernye letid par ONG Oxfam montre ki an 2016, pu premye fwa dan listwar, top 1% anterm larises ki zot posed, pu anfet posed plis ki sa lot 99% dimunn posed!

Sa lot 99%, nu ek nu fami sirviv atraver travay pu tus larzan (vann kuraz ar enn lot dimunn), e nu posed opizale, parmi top anlwaye parmi nu, enn lakaz ek enn mwayin transpor, e nu suvan andete pu nu enn-de pozesyon kuma lakaz, transpor, elektromenaze, etc.

Pu nu kapav aprofondi nu konpreansyon sa “sosyete deklas”, ki divize kumsa – e ki suvan li difisil pu truv li kuma li anfet ete – bizin kontiyne, malgre ki sa bann liv la malvi par dirizan 1% opuvwar, etidye gran panser kuma Marx, Lenin, Trotsky, Alexandra Kollontai, Rosa Luxemburg, Gramsci, Emma Goldman, Frans Fanon, Victor Serge, Raymond Williams, e tu sosyalist ki pe analize, milite, ekrir zordi – kuma David Harvey, par exanp.

## 2. Difisil pu enn ti grup dimunn kapav explwat e dominn enn gran, gran mazorite kumsa. Kimanyer zot fer li? Anfet, li atraver enn seri institisyon ki ansam apel “Leta”.

Nu bizin etidye natir Leta. Leta li inklir enn Leta permanan (servis sivil, lapolis, etc). Leta dan so sans larz li osi inklir medya meynstriym, lorganizayson relizye, sistem ledikayson mem seki peyan ek prive, parti politik burzwa, birokrasi sindikal, ONG, e bizin osi etidye Leta dan Lonbraz (*the dark State*). Sa vedir pa kapav fye lor lorganizasyon ki form parti Leta pu nu sanz sosyete deklas, ki sa Leta la pe tini. Nu bizin organize dan enn fason otonom – indepandan depi klas kapitalist, so Leta, relizyon organize, Leta pei inperyalist.

## 3. Bizin aret fye lor parti politik anfafer burzwazi kuma MMM, MSM, PT, PMSD pu dres sa inegalite anterm klas sosial.

Bizin lorganizasyon politik, me pa lorganizasyon ki liye ar burzwazi. E li pa ase pu **zis** zwenn enn parti kuma LALIT. Bizin aprann kimanyer vinn enn manb aktif – setadir aprann konzog nu talan, konpetans, kreativite, imazinasyon individyel ar rezo brans ek lezot manb; konn devlop enn form demokrasi avanse ki permet respirasyon ant enn striktir lokal (brans) ek so afilyasyon santral (dan lasanble manb ek komite santral). Bizin tultan pe debat lide e rekrit nuvo manb, atraver sirtu *Revi Lalit*, kot nu politik – dan so sans vivan – li tultan reflète. Alor, nuvo manb, li pe zwenn, individyelman, atraver raprosman ar nu program.

## 4. Ena enn yerarsi patriarkal ki opere dan sosyete. Ansam ar divizyon an de klas an-konfli, ena enn lot yerarsi.

Enn enn ti nomb (sirtu, me pa eksklizivman, zom) ki lao enn piramid anterm puvwar. Sa ti nomb la zot dominn preske tu fam ek osi, etonaman, preske tu zom. Emansipasyon fam ule dir atak sa yerarsi piramidale inegal la. Li pu liber tu dimunn depi sa ti-grup lao dan sak institisyon. Liberasyon fam se lalit pu aplati sa yerarsi anform piramid. Vre muvman fam pa viz pu fer fam individi mont dan sa yerarsi la.

## 5. Leta USA enn Lanpir avek baz militer permanan dan 200 lezot pei, li pa zis enn pei –

USA ena baz dan Moris, lor Diego. Partu dan lemond, lamas dimunn, ansam avek lepep USA, bizin ramenn sa Lanpir la alord. USA osi donn zarm Izrael ek Larabi Saudit, e zot, a zot tur, provok lager. Sa lanpir la, li enn lanpir anmemtan ekonomik (pe gard kontrol lor rezurs kuma petrol, metal ki bizin dan teknolozi, dilo, later agrikol) anmemtan enn lanpir militer. Sa lanpir la, li oto-proklame pu garanti liberte pu sa 1% la investi zot larzan an sekirite, e pu gayn akse pu vann tu so prodwi ar lamas dimunn.

## 6. Kone ki Sif ki inportan dan lalit pu sanzman

– par exanp, dimunn ki travay pu viv nu “buku”, dimunn ki kontrol kapital ek later, zot “tigit”. Pandan 150,000 an nu listwar, depi limanite emerze, nu finn viv san divizyon de-klas, san okenn Leta. Dan dernye 10,000 parla, ena sosyete sedanter ki devlope isi-laba, kumans gayn divizyon

an-klas, Leta emerze pu gardyin reyn sa minorite ki dirize la. Sa se kalite sif la nu bizin tultan gard an-tet.

Bizin konn kritik sif ki servi par Guvernman. Par exanp, li kontabiliz kikenn kuma dan anplwa, si li travay zis *enn-sel-ertan* par semenn. Alor, kan li dir ena 8% somer, li ule dir 8% dimunn ki travay mwins ki *enn-ertan* par semenn. Kan Guvernman dir 9/10 Morisyin proprieter lakaz, li pa pe kont tu dimunn ki res dan lakaz zeritye. Mem, zot pa lib pu vann sa lakaz la akoz kontra pa lor zot nom, zot kontabilize kuma proprieter!

**7. Sanzman kimanyer pu vini? Si sa 1% klas burzwa kontrol medya ek sistem ledikasyon, eski zot reyn pa eternel? Ki manyer enn parti kuma LALIT kapav ede pu sanz sa realite la?**

Ena buku fason ki sanzman vini, me 3 moter prinsipal ki amenn li.

i. *Kontradiksyon* grav intern pe menas sistem kapitalist. Etan done ki dan lemond, tu kiksoz tultan pe buze, pe sanze, zame zot anplas, e etan done kapitalis so natir-mem exzize ki li provok kriz intern, mem si lapli par so kriz fasil pu li depase, sertin kriz vinn menas li (kriz striktirel, sistemik). Kan li grav, li kapav, si pena enn parti politik klas travayer for, amenn ver enn barbari pli pir ki avan. Me, dan lezot sirkonstans, li kapav amenn gran sanzman ver sosyalism.

ii. Kan lamas dimunn ankoler, kontan pa kontan, li fer sulveman. Tutolong listwar sa li vre. Me, sulevman kapav amenn progre, kuma li kapav amenn rekil. Pu li amenn progre, li bizin artikil avek 2 lezot lafors. Parmi sa 99% dimunn oprime dan klas travayer (dan so sans larz, setadir tu dimunn ki viv par so travay manyel/intelektyel) enn seksyon, suvan invizib, li anmemtan dan klas travayer, anmemtan enn *lavanguard*. Lavanguard se dimunn saz. Se dimunn ki finn gayn lexperyans lalit lepase – swa direkteman, swa atraver ekut seki kone rakonte. Kan li rant an-kontak avek enn program politik pu sosyalism, li azir kuma enn kurwa dan 2 direksyon – lamas travayer ek enn parti. Sa 3 lafors la, kan zot artikile ansam, amenn sanzman ki anfet progre.

iii. Dan klas travayer (ankor enn fwa, nu pe refer a klas travayer dan so sans larz), ena seki apel intelektyel organik, setadir dimunn ki reflesi *depi pwindevi so klas*. Li aprann sa dan lavi. Alor, li reflesi andeor kad ideoloji dominan. So rol, ansam ar enn parti kuma LALIT, li-osi, li kuma enn kurwa dan 2 direksyon – ant lamas travayer ek enn parti.

**8. Bizin met u lespwar kot li merit ete –**

Nu bizin met nu lespwar, par exanp,

(i) dan aksyon lamas – baze *pa* lor dezir sibzektiv pu azir, me lor revandikasyon ki finn reflesi kolektivman,



Poster International Workers of the World (IWW)

(ii) dan lafors sa momenntum ki lexperyans lalit lepase reprezante, e

(iii) dan pwisans enn program politik konsyan an-komin, ki tultan dan proses finyole. Enn program se enn analiz sityasyon an-komin, enn lakorite lor revandikasyon ki nesaser, ek enn plan pu gayn aderan lor baz sa analiz e sa bann revandikasyon la. Program la viz nu bi a-lonterm, setadir egalite ek liberte pu tu dimunn – depi klas opreser e depi Leta.

**9. Konsantre lor seki nu kapav kontrole.**

U bizin kapav predir diferan aksyon u adverser, me seki inportan se pu al delavan avek dimunn ki partaz program ar u.

**10. Nu bann lorganizasyon bizin gard zot lindepandans –**

Lorganizasyon politik, kuma sindikal ek sosyal, bizin gard lindepandans depi Leta, depi bann kapitalist, depi birokrasi relizye organize, depi sosyete kominal, depi Lanbasad inperyalist.

**11. Nu bi alonterm, se pu viv dan enn sosyete san klas.**

Sa vedir, atraver enn demokrasi buku pli aprofondi, ki inklir kontrol lor prodiksyon ek lekonomi, ena enn lasosyasyon tu dimunn ansam pu prodir, distribye, e epannwir dan enn sosyete kot tu dimunn asire zot gayn seki zot bizin, e zot done seki zot kapav. Kan nepli ena klas, lerla nepli bizin enn Leta – ni birokratik, ni represif. Alor, nu pu lib. Kuma nu ti lib depi sa opresyon pandan 9/10yem nu listwar.

**12. Pu ariv sa bi alonterm, nu bizin enn priz puvwar klas travayer.**

Bann lorganizasyon klas travayer, ki pu pran nesans e pran lafors pandan enn lalit deklas kont kapitalist dan so faz revolisyoner, pu met dibut enn leta ki pu existe pu enn sel fonksyon: pu deposed seki finn deposed lamas dimunn lor bul later, met tu dibyin kolektif dan lame lansanb dimunn.

# Pozisyon Retrograd Aneerood Jugnauth

LALIT kondann deklarasyon ki Aneerood Jugnauth finn fer dan Lasanble Nasyonal Mardi 5 Avril. Li finn dir li pa pu aksepté, tan ki li la, ki introdri lang Kreol dan Parlman. Li ti pe reponn kestyon Franco Quirin. Ala seki SAJ inn dir, “... *there are a number of issues that would need to be addressed before contemplating the formal use of the Mauritian Creole language in the National Assembly. As far as I am concerned, I will never accept to introduce Creole language in the National Assembly.*” Ki sinifikasyon reyel sa butad la?

## Kolonyal

Tanki li res Premye Minis, li pe dir, li pu asire ki langaz lepep res interdi dan Parlman. Setadir Angle ek Franse pu mintenir stati privilezje ki zot finn benefisyé dan lepok kolonyal e mem pandan 48 an apre Lindepandans. So latitid li retrograd. Nu espere ki li pa res Premye Minis tro lontan, si kumsa!

## Represif

Antan ki Premye Minis li truv li normal ki dan Parlman tu Minis, tu Depite oblize pran laparol, poz kestyon, reponn kestyon, fer deba dan 2 lang etranzer. Setadir li pa dakor ki sak eli ena *leswa* pu koz an Angle ubyin an Kreol ubyin, si li ule, an Franse, dan Parlman. Sa li enn latitid arbitrer ek represif, sirtu kont liberte dexpresyon.

## Koz deryer ledò lepep

Premye Minis truve ki lepep pa nesaser konpran seki li ek so Minis ek PPS dir dan Parlman. Uswa, pli pir, li pa *ule* ki lepep kone seki li ek so Minis pe dir. Sa li depas *anti-* demokratik; li pe kareman koz deryer ledò lepep. Li absird kan deba parلمانter pre pu retransmet andirek lor MBC-TV, ki dimunn pa pu

konpran, ubyin si zot konpran morso, zot pa pu konpran *avek presizyon*. Me, selman, absird-pa-absird, ena reyelman buku zafer ki Premye Minis ti pu prefer lepep res pa kone. Sa li grav.

## Dub langaz

Pozisyon Premye Minis li ancor enn lot lexanp sa dub langaz ki suvan nu konstata depi Minis opuvwar. Pa samem Aneerood Jugnauth ki so lalyans apel ‘Lepep’, so nom mem, *avek rezon*, li *an Kreol?* Me, li kontiyn sa interdiksyon langaz Kreol. Pa samem Aneerood Jugnauth ki finn, *avek rezon*, fer par santenn miting, reynion, intervyu, program politik lor MBC an Kreol? Pa samem Aneerood Jugnauth ki an 1977, kan li ti lider lopozisyon, *avek rezon* ti met enn Private Members motion pu ki lang Kreol servi dan Parlman?

## Mepri pu dimunn

So pozisyon reprezant enn mepri pu sa 84% dimunn Moris ki koz Kreol lakaz ek sa 10% ki koz Kreol plis ancor enn langaz lakaz – kuma zot finn klerman reponn dan dernye Resansman an 2011. Setadir li enn insilt kont 94% dimunn Moris. E Premye Minis paret pa mem remark ki li pe bles dimunn.

## Foser

Si Premye Minis Jugnauth ti de-bonn-fwa, li ti pu fer lalis sa “*issues that would need to be addressed*” swadizan avan introdri Kreol dan Parlman. Me, li pa dres lalis la. Li pa bizin dres lalis parski li pena lintansyon adres sa bann isyu la ditu. Li pe koz kuma enn foser.

## Anti-demokratik

Tu sondaz depi 1977 ziska zordi donn 2/3 popilasyon *anfaver* servi Kreol dan Parlman. Li otokrat pu enn Premye Minis

totalman innyor lopinyon lepep, kan lepep ena 100% rezon.

## Seki bizin fer

Seki anfet bizin fer, se Amand Konstitisyon. Sa li sinp. Bizin amand *Standing Orders*. Sa osi li sinp. E bizin antrenn stenograf ek transkraybers ki prepar Hansard. Sa li pa osi fasil, me finn deza, dan lepase, fer kiksoz parey: *Institute for Judicial & Legal Studies* finn deza antrenn bann transkrayber Lakur Lazistis lor kimanyer ekri Kreol. Bizin osi tradir *Erskine May* an Kreol. Pu sa, etan so longer, kapav met dibut enn lekip depi MIE, Liniversite Moris ek Open University, uswa larg enn tennder. Antretan, enn Komite Parلمانter kapav anmemtan rafinn lalist ki lexpresyon ki konstitye “*unparliamentary language*”. Bann residivist dan servi “*unparliamentary words*” ki pe syez dan Parlman aktyel kapav ladan; zot ena lexperyans pratik!

Deklarasyon Jugnauth an defazaz *avek* enn seri devlopman resan lor langaz Kreol dan Moris. Zordi dimunn aksepté ki langaz Kreol, li enn langaz parey kuma tu lezot langaz. Dimunn aksepté ki langaz maternel ena enn linportans imans dan sosyete. Langaz Kreol, li ena so prop lexik ubyin vokabiler, so prop syntax ubyin gramer, so striktir spesifik, so prop lortograf. Ena enn nomb grandisan liv, revy, dokiman, tex relizye, poezi, pyes teat, literatir kuma roman ek short stori, text pu zanfan lekol, tradiksyon klasik literer, text syantifik, notis dan lagazet, kominike, lartik, lafis, trak, long metraz, kur metraz, dokimanter, dan langaz Kreol. Ena diksyoner. Ena liv gramer. Ena sayt ininternet. Ena mesaz SMS. Ena Yunit MIE. Ena kur 3 liniversite. E dayer, preske

totalite deklarasyon ki dimunn fer dan stasyon lapolis e ki servi dan tu Lakur Zistis, zot an Kreol.



Picasso, Prisoner of Conscience

Zordi, kan langaz Kreol buku pli amenaze ki an 1977 kan Aneerood Jugnauth ti propoze ki introdri Kreol dan Parlman, li vinn dir ki ena bann “issues”. Pre 40 an finn pase, enn 40 an ranpli ar amenazman lingwistik. Okontrè, “issues” ki kapav-et ti ena, fini rezud.

Dan so prop Parti, MSM, ek dan so prop *Lalyans Lepep*, ena Minis ek depite kuma Xavier Duval, Malini Sewoksing, Mahen Jhugroo, Aurore Perraud, Stephane Toussaint, ki finn dir piblikman ki zot an faver introdri lang Kreol dan Parlman. Zis Minis Bhadain, ki mank enn kiltir politik, ki finn dir li *kont*.

Anfet, kan Lalyans Lepep eli lor baz enn kanpayn politik *an Kreol*, lerla gard langaz Kreol “interdi” dan Parlman, li pe kas enn “pakt demokratik” ar lepep, kuma Arnaud Carpooran finn dir.

Inn ler pu lamas dimunn dan Moris exziz ki amand kad legal pu permet. Depite ek Minis swazir pu koz dan nu prop langaz, osi byin ki dan Angle ubyin Franse. Sa li vinn enn sanzman irzan kan kredibilite Minis apre Minis finn degradingole, e kan retransmisyon an-direk pe vinn enn realite.

Alain Ah-Vee  
Pu LALIT, 11 Avril, 2016

## Ziz Lam Shang Leen

Enn prinsip travay ki finn gid tu bann komisyon ki diferan Guvernman finn met dibut, se ki dimunn, kan vinn depoze, kapav koz dan lang Kreol. Setadir dimunn ki depoze gayn liberte koz dan langaz ki gran mazorite dimunn koze e servi tulezur.

### Liberte dexpresyon?

Enn Komisyon Danket, rapel, li osi uver a piblik pu vinn asiste. Fode dimunn kapav swiv ek konpran seki pe derule. Eski Komisyon danket lor ladrog li enn exepsyon?

Kifer Ziz Lam Shang Leen ki prezid sa Komisyon la pe fer tu pu intimid, dekuraz e mem anpes dimunn depoze an Kreol.

Plizir travayer sosyal kuma Ally Lazer ek Imran Dhannoo ki finn al depoze finn mem bizin insiste pu koz an Kreol. Me ena lezot, akoz presyon Prezidan Komisyon ek akoz silans so 2 aserer, finn sede e finn bizin sey koz Angle e riske pa reysi exprim seki zot ti ena pu dir.

Sa kalite azisman depi kikenn ki prezid enn Komisyon Danket la li inakseptab. Li enn form represyon kont langaz Kreol, langaz maternal 84% popilasyon Moris.

### Represyon

Enn kote li pa tro etonan depi enn komisyon ki ena *Terms of Reference* ki met lanfaz plito lor represyon. Li paret ki so Prezidan ule servi represyon kont langaz dimunn osi.

LALIT ti swazir pu napa depoze divan sa Komisyon la prezizeman akoz so ‘terms of reference’ tro limite a pinisyon ek represyon.



## Leela-Devi Dookhun

*We include in this dossier on the language issue an article written by LPT on the role of the Minister of Education in perpetrating abuse by suppressing the natural language of children in schools.*

The State remains silent while children are routinely *abused* in schools. We are referring to the Government’s cruel language policy. The Minister seems either blind to, or insensitive to, the on-going harm being done to children. It is not possible that she is completely ignorant of expert opinion on the harm done by repressing the mother tongue, because *Ledikasyon pu Travayer* gave her a copy of the 200-page report around the Findings of the 2009 *International Hearing on the Harm done to children by the Suppression of the Mother Tongue in School*.

We use the word “abuse” with circumspection. Abuse can be physical, but it can also be psychological. And psychological abuse, as everyone knows, is very harmful indeed to the children who suffer it.

Children are deprived of freedom in many ways in schools. But perhaps the most damaging form of repression that schools inflict and the one that qualifies as “abuse” is the on-going suppression, in the entire education system, of the children’s natural language. The mother tongue of over 90% of children is either Kreol (85%) or Bhojpuri (5%) or both Kreol and Bhojpuri (curiously not in the Census figures). Mauritian Kreol is, in addition, the vernacular – unlike in many other ex-colonies.

The main thrust of the repression of the mother tongues is that they are outlawed as formal medium. Children are taught content subjects on the condition that they learn one or two foreign languages *first*. This is how *Playgroups*

and two parents put it in their Constitutional Case against the suppression in pre-schools of the mother tongue -- a case which they *won*. The Education Minister agreed in Court in 1998 to change the pre-school curriculum that ignored the mother tongue. Is institutional memory this short? So short that the same old suppression of the mother tongue continues, even in pre-schools?

This policy of not using the mother tongue as medium then, in turn, becomes the *cause for* or the *excuse for* further suppression at the level of individual schools and teachers.

Further repression comes when children *do* speak their own language – their own mother tongue – as they will do quite naturally. Teachers often manage to accomplish this repression by “gently correcting” the child for speaking his or her mother tongue. Or a teacher may reply in the language of the school. A teacher may even use no more than a disapproving look. These tactics are bad enough.

Sometimes, children are flatly told not to speak “vulgar Kreol”. Teachers are, in effect, calling the child “vulgar”. And calling their mother and father “vulgar”. And denouncing their whole world as “vulgar”. It means, at an even more alarming level, that the child is being prevented from thinking/speaking/listening to others in his or her own natural language. This means the school is harming the child’s cognitive development, a very dynamic development that takes place quite naturally in the mother tongue.

One step worse is when Kreol is discouraged not because it is supposedly just “vulgar” (a matter of taste), but because it is supposedly “not a language *at all*” but “a mere patois”. Why this “reason” is even worse is evident: the defining characteristic of our humanity is our natural linguistic ability (whether spoken or

signed), and if we are accused of having “no language”, this means our humanity is being denied in schools. This was, of course, we should mention, the kind of daily violence meted out by colonization. But Mauritius has been independent for nearly 50 years now. So, this suppression of the mother tongue, now known to be so harmful to little children, just cannot be allowed to continue, while we pretend it is not happening.

But, the worst we have seen in the post-Independence period is the written prohibition of Kreol in a Pre-School in Curepipe. This pre-school is presumably recognized by the Ministry of Education. In *Le Defi*, 18 February 2016 under the title “Evolution du prescolaire: Ces petits qui apprennent comme des grands”, we read: “A *Kidzone Nursery/Pre-Primary School, à Curepipe ... [d]ans le bureau de la directrice, une pancarte indique les règles en vigueur à l'école ... “Il ne faut pas parler créole”*. Horrific as this written violence is, we must remember that it is the tip of the iceberg. It is not enough for this school to remove its sign. We must all rise up against this colonial abuse of children – in both its extreme forms (written up on a sign in a pre-school), in its bureaucratic form (the archaic Regulation) and in its lazy form (a Minister who refuses to take her responsibility). We need a new policy that respects children’s rights and freedoms.

#### **Why we blame the Education Minister**

We blame the Minister of Education, Hon. Leela-Devi Dookhun. She has the legal power to use her discretion and introduce Mauritian Kreol and Bhojpuri as medium. Here is what the archaic 1957 Regulation says: “**Medium of instruction...**: In the lower classes of Government and aided primary schools up to and including Standard III, any one

language may be employed as the medium of instruction, being a language which in the opinion of the Minister is most suitable for the pupils.” For the higher standards, the Regulations need to be changed.

The suppression of the mother tongue in schools also leads, tragically, to mothers falsely believing that they must, in turn, suppress their own mother tongue and that of their child. They deprive their own child of proper human language – which is long conversations in the mother tongue between mother and children.

---

## **INFO INFO INFO**

### **FIM KLIB**

Dan kontext stratezi Governman lor Smart Cities, sa mwa la Fim Klib pe get enn fim par Michelangelo Antonioni *Zabriskie Point*, enpe enn fim kilt.

### **English as Hydra**

*Ledikasyon pu Travayer* parmi bann oter enn liv lor rol inperyalist Anglofonn lor lang maternel, partu dan lemond. Li apel English as Hydra, ki pe fer referans a mons ki ena buku latet, kan kup enn, lezot puse.

### **Zurnalis travay byin lor dosye Richelieu**

Zurnalist Radio Plus ek Le Mauricien ti fer enn zoli travay swit-a konferans de pres Muvman Lakaz Site Richelieu. Anfet, zot finn kontakte biro Minis Soodhun pu dimann enn risponns a petisyon abitan laba. (Get reportaz sa lalit la, paz. 9)

### **Deba kot ICACIO**

Ti ena enn diskisyon anime par Laetitia Lor, Zasha Colah, Barthelmy Togo ek Alicia Maurel le 7 Mars. Tem ti “Missing Art Histories”. (Me, deba pa ti lor la.) Zasha ek Barthelmy ti koze dan enn fason interesan lor zot parkur, e lor linportans ki artis azir par zotmem, e pa atann Leta, etc. l

## RAPOR DUVAL: KONTROL PAR LETA: ENN MENAS GRAV PU LALIBERTE

An Avril, *Komite Inter-Ministryel* Xavier Duval finn rann piblik enn mini-rapor lor finansman parti politik. Li enn Rapor ki paret byin siperfisyel, mem bakle. E li pena sans.

Dabor, Rapor la reprezentant enn menas pu liberte ki parti politik finn ena depi Lindepandans, vini mem. Setadir drwa met dibut e tini enn parti politik li enn drwa *de facto* dan Moris. Ziska ler, parti politik lib net. U lib pu met enn dibut. U lib pu fonksyone. Personn dan Leta, personn dan Guvernman pa gayn drwa tir lay, arsel u, fuy pu linformasyon, espyone, zel u parti politik, dezanrezistre li. Zis elektora ki sanksyonn parti politik. Samem ki demokratik. Si elektora ule met enn Guvernman deor, li mete. Sel anrezistremen ki ena, se anrezistremen antan ki parti avan partisip dan enn eleksyon, sirtu pu gayn sinbol e pu kalkil *Best Loser*. Seki Duval pe propoze se asterla anrezistremen vinn obligatwar. Si u pa anrezistre, eski li pu enn deli? Langaz dan so Rapor la li for: *mandatory registration*.

Ziska zordi, ena enn sel lalwa ki kontrol selman *depans elektoral*. Li pa pretann kontrol "finansman parti politik". Sa lalwa existan li enn bon lalwa. Kapav bizin ogmant so plafon depans. Definitivman bizin ser so bann bulon ("*close loopholes*").

Sa vedit pu ena enn spes rol "rezistrar pu parti politik", enn rol ki petet ESC pu antreprean. Me, sa reprezentant enn danze mortel pu sa tiginn demokrasi ki existe. Anfet, avek enn tel lalwa ni Parti Travayist, ni MMM pa ti pu pran nesans. Leta ti pu blok zot.

Seki dimunn pa futi konpran, se kan u rod enn fason birokratik (kuma enn rezistrar, enn komiser) e pa demokratik (kuma drwa revokasyon) pu kontrol



Desin Paul Klee, Young Man at rest

parti politik, u azut enn problem ankor pli grav lor problem grav existan. Ki problem sa? Abe, parti opuvwar pu ena enn seri zuti pu li atak, arsel, bar tu parti dan lopoziyon. Li pu vinn kuma Rezistrar pu lasosyasyon ek sindika ete vizavi lorganizasyon ki pa pro-Guvernmental. Ena antrav birokratik konstan. Ziska enn tel pwin ki li vinn lur pu sanz *Office Bearers*, ziska enn tel pwin ki li obliz tu

lasosyasyon fos minits akoz zot oblize an Angle Franse, ziska enn tel pwin ki Rezistrar kapav fer lanket, e dezanrezistre enn lorganizasyon.

Anplis, Rapor Duval dir sak parti pu oblize al get oditer profesyonel sak lane. Sa kapav kut u Rs30,000 lane ubyin Rs150,000 pu enn eleksyon zeneral e so lane ki swiv. ■

## Ki LALIT dir pu kontre koripsyon par burzwazi?

1. Kontrol depans elektoral. Setadir anplis limit lor depans kandida, bizin osi limit depans par *parti* ek depans par *seporters* parti ubyin kandida.
2. Introdur drwa revok depite. Si enn parti finn abiz larzan, kapav kumans prosesis revokasyon.
3. Diminye puvwar kapitalist. Alalong, sel fason fer sa se ranvers puvwar klas kapitalist, kote politik.

Si pran sime kupe, li riske anpir sityasyon. Anplas *enn* problem: sekter prive pe fos eleksyon, u pu gayn enn *nuvo problem* san rezud anyin: u pu gayn enn kontrol par Leta, setadir par parti opuvwar, kont tu parti lopoziyon atraver enn sistem birokratik, kuma Rezistrar.

Kontrol birokratik par ESC, li pa pu fer absoliman naryin pu anpes donasyon anba latab kontiyne. Bann fenomenn kuma larzan *Sun Trust* ek larzan kofor Ramgoolam, li pu tuzur kontiyne. Dan seki Duval propoze, pena naryin ki pu anpes sa.

Selman atraver rezet *politik* sa bann parti la, rezet zot politik par mwayin *politik*, ki lamas dimunn pu kontrol zot. ■



## Rapor Duval: Viz blok parti travayer

Sistem ki Komite Duval pe propoze se pu permet tu parti politik pran donasyon nerport ki grander depi nerport ki konpayni prive, e nerport ki nom donasyon depi individi purvi li mwins ki Rs50,000, e mem depi individi deor, purvi li mwins ki Rs 1,000,000. Zot kapav depans ziska Rs1 milyon par kandida, plis Rs 1 milyon par sirkonskripsyon. Lera, si zot rekolte plis ki 10% vot dan eleksyon, Leta pu return zot zot kas depans apre rezilta. Seki gayn plis vot, pu gayn plis larzan! Tu sa reglemantasyon la li fer sa kalite finansman la paret moral.

Alor, sa li enn fason pu gard tu parti ki deza koronpi opuvwar pu leternite.

Alor, sa li osi enn fason pu anpes parti anfavor klas travayer grandi. An 1935, avek enn tel lalwa, posib Parti Travayis pa ti pu emerze. An 1970, avek enn tel lalwa, posib MMM pa ti pu emerze.

LALIT pe revandik liberte pu bann parti, enn kote, e kontrol lor depans elektoral, lot kote. Nu opoz tu finansman par sekter prive. Nu opoz tu finansman anterm larzan depi Leta, osi.

## PMSD v/s Komite Duvali

Anfet ena 6 size dan *Terms of Reference* ki so Komite ti sipoze pe konsidere. Li pankor rann bibliik okenn rekomandasyon lor reprezantasyon proporsyonel ek reprezantasyon fam, ni lor deklarasyon kominote, ni lor mezir anti-transfiz, ni lor plis puvwar pu ESC (*Electoral Supervisory Commission*) ni lor Rodrig.

Me, par kont, pandan Kongre PMSD, Duval finn al byin lwin lor size deklarasyon kominote: Li finn dir *Best Loser* kominal

bizin reste! Li enn so 2 item programatik. Lotla se non a penndemor.

## Kifer Asterla?i

Partu dan lemond, lekar ant ris ek pov inn byin ogmante. Seki sa ule dir se gran kapitalist ena buku plis puvwar (puvwar larzan) asterla pu zot influyans sa sistem demokratik (mem li ase bankal deza) ki nu ena asterla.

## Lezot Size ki Komite Duval sipoze pe gete:

- Duval sipoze get lezot size swivan:
- Reprezantasyon proporsyonel ek reprezantasyon fam
- Kestyon deklarasyon kominote pu Best Loser.
- Mezir anti-transfiz.
- Plis puvwar pu ESC

## Travay parfwa, depans tuletan

Dan sekter konstruksyon, travay li byin dir. Anplis ki travayer pe travay avek kondisyon difisil, ena osi travay lor kontra. Kontra la determine par grander sayt la. Pu kumanse zot kapav ofer enn kontra pu sis mwa travay. Apre sis mwa pase, si travay la ankor ena buku, zot renuvel kontra ankor sis mwa. La osi, u bizin pa fer lagel avek formenn, satisfere zot demand, donn zot zefor ki zot dimande.

Apre lot sis mwa pase, si sayt konstruksyon la pe al termine, zot kumans diminye kontra. Kapav pu enn lot trwa mwa. Apre de mwa, enn mwa, de semenn, enn semenn. Depann ki kantite travay reste lor sayt la.

Pu apre dir u perna travay, pa pe renuvel kontra.

Kan ena travay pu fer, apel u, ubyin pu telefonn u, apre trwa mwa ubyin sis mwa. Lera zot pu redonn u travay. Me, antretan, travayer dan konstruksyon, nu bizin kontiyn viv parey.

U dilo bizin peye. U lalimyer bizin peye. U fami bizin manze pu viv. Tu u bann lezot depans vinn parey.

Ki kalite lavi u bizin fer fas, kan u travay lor kontra ubyin bat-bate.

ALY

## Expo lar dan Grenye

Expozisyon Borderline dan Grenye an Avril ti enn evennman artistik ki finn fer sa ansyin batiman kot larad Port Louis reviv. Grenye enn batiman istorik kot pandan buku lane tu marsandiz ki rantre ek sorti Moris ti traverse.

Pandan 2 semenn bann vye kolonn ek miray grenye ti retransvay enn nuvo lavi atraver diferan artis zot kreasyon, ar kuler, tu kalite form ek son. Ti ena vin artis ki finn expoz katre-vin dizet kreasyon. Ti ena tu kalite teknik, medyom, forma ek stil: lapintir alwil, akwarel, skilptir, instalasyon, foto, kolaz, desin, prozeksyon video ek melanz diferan teknik. Expo la ti enn tantativ interesan pu kree enn interaksyon, enn dialog ant diferan kreasyon, ant diferan regar lor peizaz, lor dimunn Moris. Ena kot diferan kreasyon reysi koz ant zot, reysi etablir enn rankont ant zot, ena ki an armoni, ena osi ki separe ek an dezakor.

Li domaz ki dernye zur expo bann organizater ti kumans anlev enn parti bann kreasyon avan ler ki expo la sipoze termine. Sa finn priv inpe dimunn ki finn vini pu kapav apresye totalite bann travay ki ti pe expo.

Sa expo la organize ek instale par Laeticia Lor ek Alicia Maurel.

Artis ki finn partisip dan sa expo la: Nirmal Hurry, Deannaa de marigny, Salim Currimjee, Maita Chagny, Jocelyn Thomasse, Gael Froget, Chole Ip, Simon, Back, Maryann Maingard, Khalid Nazroo, Stephanie Desvaux, David Constantin, Stina Spangenberg Becherel, Baba Gaia, Azim Moolan, Elisabeth de Marcy Chelin, Krishna Lutchoomun, Celine Le Vieux, Henri Crespy, Yves Pitchen.

# LEXTREM DRWAT FINANS LIMIT MANDA

Buku dimunn finn etone ar nomb dimunn – de tu bor – ki kareman obsede ar kestyon “limitasyon manda” kuma sel solisyon pu tu problem politik, ekonomik ek sosyal ki ena. Akoz sa obsesyon ar limit manda fer buku ditor dan deba par exklir tu refleksyon lor veritab program politik, enpe resers lor ki kote sa lamod la sorti ti inportan.

Dimunn depi Sheila Bunwaree ziska tu kalite sindikalist, lezot dimunn dextrem drwat ziska seki aparaman de-gos, *Democracy Watch*, tu editoryalist – zot tu koz e re-koz nesese met enn lalwa pu limit manda bann eli. Anfet, li etonan ki tu sa diferan kuran politik tom dan pyez “sel solisyon limit manda” parski li anfet enn limitasyon kareman *birokratik* lor prosesis “demokrasi”. E telman li enn lamod irasyonel ki buku dimunn, ki dir ki zot anfaver “demokrasi”, zot truv “limitasyon manda” enn bon zafer, mem si li diminye demokrasi.

Seki ti pe vinn pli trakasan ankor, se li enn lamod pa zis dan Moris. Dan buku pei Afrikin (depi gran “demokratizasyon” bann lane 1990’s) tu dimunn finn pas tu zot letan diskit “met limit manda” pandan 10 an, lerla lager pu tir li pandan prosenn 15 an, antretan fer referendum lor la, ziska enn pwin kot “discourse” politik, si u ekut program lor Lafrik BBC ubyin RFI, li zis lor limit manda, pa limit manda, limit manda – dan buku pei Lafrik. Anmemtan, pa tann okenn deba lor *program*, dan moman kot byin byin bizin. Kot deba lor reform agrer? Lor kreasyon anlwa? Lor sekirite alimanter? Lor kontrol demokratik lor tu resurs natirel? Tu sa size la finn ranplase par deba lor “limitasyon manda”. Ondire li enn “panacea”.



Tablo Anne Delplace

Seki bizar, se limitasyon manda, li enn fars. Par exanp, kan Vladimir Putin fini fer so 2 manda kuma Prezidan, li al fer Premye Minis, so nomini Dmitri Medvedev fer Prezidan, lerla li re-vini an 2012. E si u blok individi la, u gayn enn dinasti ki ranplas li. Par exanp, dan Leta Zini, Bill Clinton met aryer, so fam Hilary vinn par divan, George W Bush met aryer, so frer Jed Bush vinn dan Primaries pu Parti Republikin. Dan Singapore, Lee Kwan Yu, zom servis sekre Britanik ti met opuvwar pu pran Lindependans pu evit lagos pran puvwar, kan li kumans retir li, so garson Lee Hsien Loong prepar li pu vinn Premye Minis (apartig 2004). Moris, nu ena mem mem fenomenn. Alor, limitasyon manda li enn fos solisyon net. Pena sime kupe depi kontrol *demokratik*. Kifer dimunn ki pres limitasyon manda pa ariv truve ki revokasyon pu mars pli byin ki tantativ kontrol birokratik par Leta permanan kont leta ki eli demokratikman? Kan dimunn tom dan sa pyez la, li grav.

Tanki preske tu deba politik res lor kestyon limit manda, li ena enn lefe perver: li anprizonn lavi politik dan enn kankan kompletman inital. Enn ti resers lor Google montre ki ena 24 pei

Lafrik ki finn rant dan sa deba pu re-tir limit manda! Alor, anplas debat program, dimunn res zis lor sa reglemantasyon legalist la. E Moris, li enpe parey.

Kuma leker Revi LALIT petet kone, dan USA pa ti ena sa limitasyon manda pu Prezidan. Lerla, kan ti ena New Deal, enn konsortyom gran kapitalist finn ankoler ki F. D. Roosevelt (premye e sel Prezidan US ki finn fer plis ki 2 manda, e sel Prezidan ki ti enpe eklere) ti met sekirite sosyal dibut pu dimunn mizer, alor sektor prive finn mobiliz rezurs pu fer Parti Republikin lans enn kanpayn pu 22yem Amandman Konstitisyon, setadir limit manda Prezidan Republik. Finalman lalwa la ti pase, an 1947 par la. Me, laplipar lezot pos dan USA pena limit manda.

Ankor enn fwa, dan bann dernye lane, se ladrwat dan USA, sann kut la lextrem drwat, ki pe ale-mem lor limit manda pu tu pos dan politik dan Lamerik. Anfet dimunn ki finans lextrem drwat USA apel *Tea Party* (ki ena lyin ek Klu Klux Klan, bann ki dir swadizan ras blan bizin reyn siprem), setadir bann frer Koch, zot anfet obsede ar mobilizasyon pu limit manda demokratik.

Ala enn but dan enn “book review” ki fek pibliye dan *Truthout* lor finansman sa

kanpayn la, otur *Tea Party* (liv par enn fam apel Jane Mayer):

“Kan nu get aktivism *Tea Party* dan Leta Washington nu aprann buku. Dapre Mayer, ‘Seki dimunn ti pe dekrir kuma enn *flanbe populism alabaz* ti anfet prodir par enn grup baze dan Washington ki ti apel li-mem *Citizens for Congressional Reform*, ki ti met dibut ar plizir santenn milye dolar depi David Koch [bayer-defon extrem drwat]. Li ti pe servi so karne manda kuma enn pukni pu sufle sa *flanbe* la.’ Tem ki ti obsed zot sete limitasyon manda. Mayer ti raporte ki bann frer Kochs ti donn larzan pu finans bann ‘roder sinyatir profesyonel pu gayn ase nom pu fors enn Bil lor la.’ Mari alabaz, sa!”

*“Tea Party activism in Washington State offers a telling example of how this has played out. According to Mayer, ‘What supporters billed as a ‘prairie fire of populism’ was the product of a Washington-based group calling itself Citizens for Congressional Reform, which was started with hundreds of thousands of dollars from David Koch. Fanning the flames was his checkbook.” The issue they fixated on was term limits and Mayer reports that the Kochs provided revenue to pay ‘professional signature gatherers to collect enough names to get on the ballot.’ Grassroots, indeed.”*

Alor, li klerman enn kanpayn ki finn finanse par lextrem drwat dan Leta Zini.

Seki intrig nu dan LALIT se kimanyer otan dimunn gob sa! Dezespwar? Lapares intelektuel? E kifer pa enn sel manda? Kifer pa drwa revoke? Kifer pa manda pli kurt? Anfin kifer zot truv leta permanan telman extra ki bizin limit manda bann ki dan Leta eli? Otan kestyon.

Pu Book Review ki nu finn site an antye: <http://www.truth-out.org/opinion/item/35472-there-s-a-vast-right-wing-conspiracy-afoot-fueled-by-dark-money>

## VIKTWAR LOR ID CARD

Dan dernye 3 an, depi Ramgoolam vini ar so Kart Idantite Biometrik, e kuma enn rezilta direk mobilizasyon kont sa ID Kard la, finn ena enn seri viktwar ase spektakiler:

- Data base santral Ebenn fini detrir.
- Dat extansyon validite ansyin kart fek ranvoye pu enn an, ziska lafin ka Privi Kawnsil.
- Proze pu amand lalwa pu

fors travayer donn lanprint pu prezans finn abandone par Guvernman.

Si u anvi get aksyon LALIT, ki finn kontribiye pu amenn sa viktwar la, get Revi LALIT numero 120.

Sa batay kont ID Kard finn aport buku leson. Enn parmi se inkoerans politik pa zis ansyin Guvernman me osi nuvo la.

---

## Inkoerans Guvernman Lalyans Lepep lor ID Kard Biometrik

Dedlayn pu tir ID Kart Biometrik finn al 31 Mars 2017.

Malgre so kanpayn elektoral ti kont ID Kard Biometrik, malgre Zizman dan Ka Pravind Jugnauth ki statye ki stokaz done biometrik, li illegal, guvernman pa finn azir dan enn fason koeran.

- Guvernman pa finn detrir foto ki enn done biometrik
- Guvernman pe kontinye pran lanprint. Sel diferans, lanprint pu garde tanporeman e li pa pu stoke dan enn databeys.

- Tu amenazman represif diferan seksyon lalwa otur ID Kard biometrik ankor anplas. E sa, plis ki 16 mwa ki Lalyans Lepep opuvwar

- Minis Bhadain, ki ti Minis IT, finn servi mem taktik ki ansyin guvernman pu intimid dimunn al tir kart par met nuvo dedlayn. Kan li byin kone ki ena lapel Dr Madhewoo dan Privy Council.

Antretan, ena enn lot viktwar. Sa proze pu amand lalwa pu obliz travayer donn lanprint pu prezans finn abandone.

---

## Amandman dan Lalwa Travay pu fors anplwaye donn lanprint biometrik, abandone

Minister Teknolozi ti propoz enn amandman dan *Employment Rights Act* pu fors anplwaye donn zot lanprint pu bann bezwin prezans. Ti ena enn konsiltasyon parmi konfederasyon sindikal ek parlamanter ek lezot. Finn ena buku reaksyon opoze fas a propozisyon la.

Ena sindikalis inn dir ki zot pare pu al lakur pu konteste sa, e finn ena komanter delapar sindika a Minister Travay. Swit a enn kestyon parlamanter par Alan Ganoo a Minis Travay, li finn dir ki pena enn propozisyon pu amand lalwa existan konsernan lanprint lor sayt travay (12 Avril). Bizin dedwir ki zot inn retir zot amandman e sanz zot pozisyon fas a enn leve buklie kont sa.

Li enn rezilta konsyans ki finn devlope otur proteksyon data biometric depi aksyon bann travayer pu konbat sa lor sayt travay, plint ki finn loze avek *Data Protection Commissioner* e par laswit ruling, lapel par de anplwayer, Alteo ek Clavis, divan Tribinal ICT kot zot finn perdi. Tule de patron finn fer lapel a Lakur Siprem. Nu tuzur pe atann enn zizman. Deba ek kanpayn kont ID Kard biometrik finn usi kontribie a sa U-turn la. Li inportan res vizilan pu ki patron ek guvernman pa sezi enn lokazyon pu fors travayer donn zot lanprint.

# KANPAYN LALIT KUMANS MORDE

## JUGNAUTH LOR DEFANSIV LOR SMART CITIES

**Kan Premye Minis Aneerood Jugnauth ti zwenn tu bann sef sekter prive**

**Merkredi 20 Avril pu konsilte zot lor Bidze 2016,**

**li finn sezi lokazyon pu pres moral kont so prop stratezi:**

*“L’immobilier, ce n’est pas du développement réel”,*

**li dir, avek rezon.**

Alor, finalman kanpayn LALIT kont stratezi politik ki baze lor I.R.S., Gated Communities, Smart Cities, etc pe kumans kree felir dan sa ideoloji neo-liberal dominan la.

### “Tro fasil”

SAJ osi dir: *“L’immobilier est un développement trop facile, pour en faire que des profits”.*

Diferan sef sekter prive inn sey rasir zot mem. Arnaud Dallais, par exanp, dir ki SAJ pa finn dir aret investi dan *“real estate”*, me li finn simpleman dir *“Il faut aussi des investissements dans d’autres secteurs. C’est le message que moi j’ai compris de ce que le Premier ministre a dit.”*

Hector Espitalier-Noël inn dir mem zar zafer: *“Il [SAJ] a dit qu’il ne faut pas tout miser sur l’immobilier.”* *Le Deft Quotidien* 21 Avril, 2016).

SAJ finn osi dir, *“Je ne le considère pas comme du vrais développement.”* (*Le Matinal*, 21 Avril). E dan *Week-End* Aneerood Jugnauth azute ki pa bizin fye lor *“real estate”* me lor *“productive activities”* Ala laverite: kan investi dan spekilasyon later, kuma LALIT pe dir dan so kanpayn aktyel, li napa produktif. Li napa devlopman.

*L’Express*, enn lanpir lapres ki osi investi dan imobilye ,preske panike. Li pa sit SAJ motamo ditu. Me so tit al pli lwin: *“La strategie d’investissement dans l’immobilier remise en cause?”* E *L’Express* azute, *“Même s’il ne le dit pas, le nouveau ministre de Finances [SAJ], nous dit-on, revoir le concept des smart cities et autres technopoles annoncées en grande pompe l’année dernière ...”*

Dan LALIT, nu ti kone ki nu kanpayn pe zwenn avek enn sutyin popiler extraordinier. Alor, nu finn atann felir dan larmir patrona/Guvernman. Me nu pa ti atann li osi vit, ni osi ot. dan yerarsi Guvernman.

Anfet, depi lepok lesklavaz, vini-mem, atraver lepok langazman, ziska zordi, Leta Kolonyal, lerla Leta post-Independans, finn ale-mem sibvansyonn pro-

prieter tablisman, ale-mem rul pei la kumsidire enn su-komite tablisman. Tu sa larzan ki Guvernman pe al ponpe dan Smart Cities tablisman, li form parti sa sibsidi orib ki Guvernman pe kontiyn akord proprieter later.

Kanpayn LALIT dir ki later enn pei oblize itilize dan lintere lepep, e napa dan lintere sa 2-3 dimunn ki proprieter -- depi lepok esklavaz vini-mem.



### Craft Aid lisansye 129 Travayer

Lindi 28 Mars travayer *Craft Aid* enn lizinn ki truv dan Mon Ros, finn ferme ek finn lisansye 129 travayer. Marie Lourdes ki travay *Craft Aid* finn rakonte ki kan zot vinn travay sa Lindi Pak, laport lizinn ti ferme ek tu travayer finn res lor sime. Patron finn apel travayer 5 par 5 e finn remet enn let pu anons lisansiman. Patron dir ki finn fer fayit ek pena kas pu pey travayer pu mwa Mars.

Travayer *Craft Aid* ena ant 6 a 35 an servis e finn travay dan prodiksyon polo, rob ek jaket.

Travayer finn byin bulverse avek sa lisansiman brital san lapey e san okenn konpansasyon. Kuma lalwa ete zordi travayer pena severens alawens me kapav zwenn werkfer program apre ki finn met ka Lakur Indistriyel.

Mardi 5 Avril, travayer ki finn perdi travay ansam avek sindika CTSP finn fer enn manifestasyon Port-Louis pu reklam lapey ki patron dwa pu mwa Mars.

Travayer pe bizin al rod enn lot travay dan sa lepok kot li pa fasil zordizur pu gayn travay. Ziska ler pankor gayn lapey.

Lartik baze lor temwanyaz Marie Lourdes Peerally dan kur alfa Samdi LPT

Edite par grup Alfa Samdi 16 Avril

# Festival Mama Jaz

Depi le 25 Avril ziska le 1 Me, pu ena enn festival jaz apel “Mama Jaz”. Li pe fer dan enn fason byin diferan avek fason ki lezot festival organize avan, e sa, dan enn bon fason.

- Ena buku plis desantralizasyon dan plas ki plis aksesib kuma Caudan, Konservatwar Q.Bornes ek Mo’Kaz dan Moka. Buku but dan sa festival-la pu gratis. Mem kan ena konser peyan, finn fer provizyon pu ki ena “balans son uver” avan.

- Anplis ki bann konser par mizisyin jaz koni dan Moris, pu ena osi bann latelye uver pu

dimunn tu kalite nivo aprann plis lor jaz. Ena plizyer sesyon dan Konservatwar ki uver pu tu dimunn ki interese. - Sa bann sesyon la pu gide par Jerry Leonide, enn konpoziter ek pyanis jaz eksepsyonel. Pu ena osi sesyon pu dimunn ki anvi dekuver jaz anime par zenn mizisyin ki pasyone ek ena lexpertyans dan jaz.

Ena osi deba lor lasosyasyon mizisyin jaz Moris anmemtan ki form parti sa program-la.

- Anmemtan ki ena tusala, pu ena enn seri konser jaz par Jerry Leonide, Neshen

Teeroovengadam, Belingo Faro, Jonathan Boncoeur ek Freedom Quintet, Fink Factor, Phillipe Thomas, Lakaz Jammers, Samuel Laval, Edensia, Music Kabinet, Dean Nookadu, Elektro Jazz. Sertin mizisyin byin-byin koni ek lezot pankor osi koni par enn piblik larz. Nu pu gayn lokazyon apresye zot tu.

Seki osi interesan avek sa festival-la, se li finn vinn posib par organizater, koperasyon teknisyin son, dizayner, bann plas kot zwe lamizik layv, osi byin ki mizisyin.

---

## Lalit an aksyon

### Kanpayn LALIT pu kontrol later ek lamer

LALIT ti organiz enn Kolok lor *Smart Cities* zur selebrasyon lindepandans, le 12 Mars. 7 manb LALIT finn koz lor diferan laspe *Smart Cities*, e finn ena deba plenyer, osi byin ki deba dan ti-grup. U kapav ekut 6 diskur lor nu websayt, u al direk lor nu channel Youtube. Sa kolok la finn kilminn dan enn lakorite pu amenn enn kanpayn nasyonal pu lamas dimunn gayn kontrol lor kimanyer itiliz later ek lamer, pu ki devlop plantasyon manze, lelvaz, lapas ki tu mars ansam ar lizinn transformasyon prodwi alimanter. Kumsa ki prodwir manze dan diferan form e prezerv li, transform li, tusala pu ki kree anplwa lor gran lesel. Kumsa osi Minis Lozman kapav kree plan lozman pu dimunn ki pena lakaz, olye ki anbank dan enn stratezi kapitalis otur *Smart Cities*.

Alor, apre kolok, finn ena distribisyon trak dan diferan landrwa. Plis, LALIT finn deklans enn seri Kozri-Deba, ki pe fer kolonn vertebral nu kanpayn. Nu premye reysnion ti Petite Riviere, swivi par lezot landrwa kuma La Tour Koenig, St Pierre, Camp Levieux, Baie du Cap. Sa seri Kozri-Deba la pe kontinye. LALIT finn osi fer enn kanpayn lafis, “*Smart Cities, dan ki lintere?*” enpe partu dan Moris. Nu rasanbleman 1 Me alokazyon fet travay, li pu lor sa tem-la. Plis detay dan Revi.

### Sutenir muvman Baie du Cap

LALIT pe donn kudme dan enn muvman ki finn leve dan Baie du Cap kont proze MonRoze. Sa proze la donn enn lide danze ki Smart Cities – enn extansyon IRS, kot pe amenn kolon pu reste e travay, e kot donn plis konsesyon pu kapitalis ladan – reprezante pu dimunn ordiner. Dimunn dan Baie du Cap finn fini realize danze proze MonRoze. Dimunn laba fini truve proze MonRoze pa pu kree anplwa pu dimunn dan landrwa (mem ki zot promet anplwa dan kumansman), e alonterm, zot fini par fer dimunn ale pu zot buz sime pu ki zot gayn kontrol lor lakot pre kot lamer, parey kuma finn arive Pointe aux Roches. Ziska ler, dimunn finn fer petisyon, avoy Alain Wong (Minis Lanvironnman), finn organiz konferans de pres e ranforsi mobilizasyon. Dimunn fini truve ki pu opoz stratezi IRS/*Smart Cities*, bizin zwenn kanpayn pu kontrol lor later e lamer, pu plant manze ek transform li. U kapav lir lartik lor la dan Revi.

### Komisyon Sindikal LALIT

Komisyon sindikal LALIT finn zwenn a 2 repriz pu diskut sityasyon klas travayer ek muvman sindikal. Nu finn ena rankont avek dirizan sindikal lor kestyon privatizasyon. Nu opoz privatizasyon. Me anmemtan nu truv li nesaser pu ki kadre li dan lalit politik pli larz pu pa zis opoz privatizasyon, me amenn lalit pu ki travayer ena plis kontrol lor prodiksyon, lor ki kalite prodiksyon, ek lor mwayin prodiksyon.

### Kanpayn kont ID Kard biometrik

LALIT, ansam avek federasyon sindikal CITU, FCSOU, CTSP, FTU, ansam avek asosyasyon konsomater ACIM, organizasyon fam MLF, ek Sant Goomany finn pran pozisyon pu ki etann dele ID kard, pu ki dezaktiv pis dan kart biometrik ki fini livre, detrir foto ki permet sirveyans permanan, e tir represyon dan lalwa ID kard. Guvernman Lepep finn finalman ranvway dele ziska Mars 2017. Plis detay dan Revi.

# Dekuver fragman avyon dan Rodrig

## Eski li depi avyon Malaysia Airlines disparet an 2014?

Le 30 Mars, de turist Reyone, Dominique Vitry ek so fam Suzy finn dekuver enn fragman ki sorti depi enn avyon, lor laplaz Var-Brûlé, Rodrig. Sa fragman la finn al pu verifikasyon Malezi ek Canada pu konfirme si li depi sa vol MH370.

Lekterpurapel ki depi le 8 Mars 2014, vol MH370 finn disparet apre ki li finn dekolé depi Kuala Lumpur pu sipoze al Pekin. Kan avyon finn disparet ti ena 239 dimunn abor, pasaze ek manb lekipaz. Depi sa disparisyon la, finn dekuver but-but avyon dan nu rezyon, pran depi Sid Afrik, Mozambik, Larenyon ek dernyerman Rodrig. Finn deza ena konfirmasyon depi lotorite Lostrali ki debri depi Mozambik sorti depi vol MH370.

### Inplikasyon baz Diego?

Me seki ankor enn mister ki bizin ekersi, se posib implikasyon baz militer US Diego Garcia, lor disparisyon sa avyon la. Ena buku supson ki vol MH370 avek so 239 pasaze finn detrir par larme US baze Diego Garcia sirtu kan pe ramas debri dan rezyon Losean Indyin. Dominique Paturau, enn pilot retrete avek buku lexpéryans ek Dr Michael Atchia finn expoz sa posibilite ki militer US baze lor Diego Garcia finn reponsab pu desann avyon vol MH370 avek so bann pasaze.

Ala seki zot finn dir dan lapres;

**Extre Intervyu Dominique Paturau (Matinal 28 Ut 2015)**

Q. Pensez-vous, en tant que pilote chevronné, qu'il s'agit bien des débris du vol MH 370 qui ont été récupérés à l'île de la Réunion alors que l'appareil faisait route vers la Chine ?

R. *Quand on suit l'historique de ce vol, on se rend compte que les choses n'ont pas tourné rond. On ne peut ainsi couper le transbordeur d'un appareil, et toutes les données sur le système*

*ACARS - des renseignements fournis en permanence sur l'état des moteurs - avaient disparu. Quelqu'un a dû, forcément, coupé le transbordeur. Il y a eu délibérément sabotage ou attentat. Le pilote a, sans doute, monopolisé le poste de pilotage... Et puis, je conçois mal que l'on ait récupéré si peu de débris d'un appareil de cette taille. Peut-être qu'il a été abattu par l'armée américaine s'il s'est approché de la base militaire de Diego Garcia.....*



**Extre lartik Dr Michael Atchia (Le Defi 11 Avril 2016)**

*Sub-scenario 1 : The plane ran out of fuel and crashed into the sea close to Diego Garcia.*

*Sub-scenario 2 : The plane was forced to land on Diego, a highly restricted area.*

*Sub-scenario 3 : The plane headed towards the US base, was given multiple warnings by the American forces, did not respond or change course (remember its communications systems were switched off) and was inevitably shot down as it approached the base (Remember the July 3, 1988 incident when Iran Air Flight 655 was accidentally shot down by USS Vincennes thinking it was a military plane coming at it).....*

*Hence, once again, the Diego scenario has to be investigated. President Barrack Obama can surely help Malaysia by ordering an enquiry and deny or otherwise that this plane did NOT approach*

*or land and was NOT shot down on the night of the 8th/9th March 2014 at Diego.*

Anfèt li ase etonan ki, depi kumansman, tu lotorite e tu medya meynstriym refiz mem kontanple ki sa disparisyon avyon la li rezilta enn akt terorist. Sa li sirtu etonan kan ena buku dimunn dan sa parti lemond ki kone ki finn ena tortir dan Diego Garcia, e “rendition” prizonye. Li osi etonan parski pilot la ti ena similasyon aterisaz Diego lor so kompyuter.

### Lalit an aksyon

#### Kondann pozisyon SAJ kont langaz Kreol

LALIT finn kondann pozisyon retrograd Aneerood Jugnauth kont itilizasyon langaz kreol dan Parlman. U kapav lir nu repons dan Revi.

#### Rankont avek manb PTA lor langaz Kreol

Manb komisyon ledikasyon LALIT finn zwenn manb PTA pu diskite lor langaz Kreol dan lekol primer dan rezyon Lwest. Sa rankont la finn ede pu klarifye buku kekyon ki manb PTA ti ena lor sa kekyon-la. Nu invit lezot manb pu organiz rankont similer.

#### AR ek KILTIR

LALIT finn sirkil enn dokiman lor “lar ek kiltir”. Li pu servi kuma enn baz pu deba. Nu pe anfèt organiz enn demi-zurne brainstorming lor kekyon Lar ek Kiltir an zeneral. Li pu Dimans 5 Zin 10:30 am. Si u anvè gain enn kopi sa dokiman ki fini sirkile la, kontakte nu. (208 5551, ubyin [lalitmail@intnet.mu](mailto:lalitmail@intnet.mu)). Li an verson Angle ek Kreol.

# Rapor lor konferans Marxism 2016 dan Melbourne, Lostrali – par Shabeela Kalla

Tu le lane *Socialist Alternative (SA)*, ki enn lorganizasyon politik dan Lostrali avek lekel LALIT ena bann bon relasyon, organiz enn Konferans, 3 zur an Mars, dan Melbourne. Sa konferans la reinir pa zis par santenn zenn me osi manb diferan brans SA dan Lostrali ek orater internasyonal e li sirtu akse lor diferan sesyon kozri, prozeksyon fim, expozisyon foto, ki lye avek analiz Marxist.

LALIT, dan so program pu internasyonalism finn deza dan lepase partisip dan sa Konferans la. An 2014, kamarad Rada Kistnasamy ti al dan mem konferans lor non LALIT. Sa lane la, osi, SA finn invit LALIT pu partisip dan zot konferans ek pu deleg enn manb ki pu, osi, anim enn sesyon. Mo finn gain lokazyon pu partisip dan sa konferans la sa lane la. U pu truv anba enn ti rapor lor sak sesyon ki mo finn gain lokazyon asiste dan Konferans Marxism 2016. Li bon note ki sa lane la konferans Marxism 2016 finn gain ape pre 1,500 partisipan e SA finn rekrit apre pre 20 nuvo manb gras a sa konferans la.

## Sesyon lor Marxism Peruvyin

Sa sesyon la ti anime par Sergio Monsalve-Tobon, manb SA. Li ti enn sesyon lor kuma kuran Marxist finn ne dan Peru ek ti enn listrik lor lavi politik José Carlos Mariategui. Li ti interesan pu kone kuma klas travayer ti vinn ase for a enn sertin moman dan Peru ek kuma parti Trotskis dan Bolivi ti inflians inpe laliyn politik José Carlos Mariategui, ki pa ti tuletan byen degos.

## Sesyon Prozeksyon fim

Li ti enn sesyon lor “Radical Reels – From Class War to Cold War in Hollywood (The Reds

who built the Silver Screen)” Enn sesyon ki ti anime par Liam Ward, manb SA.


Li pa ti enn sesyon prozeksyon fim a propreman parle parski li ti plis enn kozri kuple avek bann ti prozeksyon dokimanter arxiv + bann foto arxiv + bann ti extre intervyyu sindikalis dan Hollywood dan bann lane 1930 – 50. Li anfet enn travay resers extraordiner ki kamarad Liam finn fer ek sa sesyon la ti byen interesan. Li montre anfet sa lalit ki ne kan bizin al ver kreasyon enn sindika dan enn nuvo kalite sekter travayer e la, an lokirans dan bann lane 1930, li ti dan sekter fim ki ti enn byen nuvo sekter dan Lamerik. Li osi montre linportans enn gid politik kan klas travayer pe organize se ki, malerezman, pa ti ena kan bann travayer sa nuvo sekter la ti desid pu suleve.

Nu finn osi gain lokazyon get extre dokimanter ek foto byen rar otur lagrev ki ti ena dan bann lane 30 – 50 dan *Walt Disney*.

## Sesyon lor Represyon ek Rezistans dan Mexik

Sa sesyon la ti anime par Lulu Garcia Lourdes, sinpatizan SA ek par Skype Omar Garcia. Li ti sirtu akse lor konsekans ki kolonizasyon, represyon konstan ek revolusyon finn ena lor Mexik ek kot li sitye li zordi sirtu o nivo sosyal. Zordi, dan Mexik, ena enn gran muvman Mexikin ver Lamerik ek sa li enn trafik ki kontrole par bann kartel dan Mexik ki pirman enn trafik imin. Mexik li osi enn pei kot ena buku krim kont fam zis parski zot fam; dapre kamarad Lulu, sak 1hr tan, 5 fam asasine.

Moman pwayan dan sa sesyon la, se temwanyaz kamarad Omar lor Skype, depi Mexik. Li enn sirvivan se ki apel “*forced disappearance by police*” kot bann lapolis dan Mexik literalman kidnap, sirtu etidyan, ek zame ou regayn zot nuvel ou mem kone kinn ariv zot. Alor kamarad Omar ti kidnape li osi dan “*Ayotzinapa disappearance*”



Alfredo Martinez, Travayer

me li finn resi sove ek ziska zordi li pa kone kinn ariv so lezot kamarad.

### **Sesyon lor Langaz ek Lagos**

Enn sesyon anime par Daniel Taylor, manb SA. Li enn kozri ki ti akse lor langaz ki definir konesans ek kuma konesans li enn puvwar ek sa finn definir buku teori resan lor sosyalis radikal. Li finn osi koz lor limitasyon bann *social media* kuma Facebook, Twitter, etc, ki bann *no man's land* e nesosite pu batir pon avek bann akademisyen degos.

### **Sesyon lor Enn analiz Marxist Leta Islamik**

Enn sesyon ki ti anime par Nick Everett, manb SA. Li ti enn explikasyon lor kuma ISIS finn pran nesans me dan enn perspektiv Marxist. Fason ki invazyon Lirak par Leta Zini finn kree enn divizyon sektarist dan pei ek sa finn pus buku dimunn pov ver grup relizye pu zot kapav sirviv ek tusala dan enn kontex kot ti ena enn represyon masif dan lwes Lirak par Larme Leta Zini kont bann Suni.

### **Sesyon lor Refizye, Rasism + Rezistans**

Sa sesyon la ti anime par enn panel orater. Se ki ti pli markan dan sa sesyon la se kozri Aran Mylvaganam, ki prezidan "*Tamul Refugees*" dan Lostrali. Li ti koz lor okipasyon ek persekisyen militer dan Sri Lanka e kuma Lostrali finn konplis avek sa leta Budis ki pe kontiyn persekit dimunn Tamul dan Sri Lanka. Zordi, ena bann pos rezistans dan Nordes pei kot ena buku diskisyon lor kuma pu organize pu ena enn lalit politik pu lape ek egalite dan Sri Lanka.

### **Sesyon lor Lalit Kird pu Lindepandans**

Enn sesyon anime par Kostas Rologas, manb SA  
Enn expoze interesan lor idantite kird dan lemond arab sirtu dan la Tirki ek explikasyon lor ki ete

PKK ek PKY ek politikman ki zot reprezante.

### **Sesyon lor Lanze Eleksyon dan Leta Zini**

Li ti anime par Joel Geier ki editer asosye "International Socialist Review" dan Lamerik Enn explikasyon, byen detaye ek byen ankurazan, lor se ki eleksyon dan Lamerik reprezante zordi. Li finn sirtu explik ki asansyon politik Bernie Sanders pe reprezante pu lagos zordi ek ki li pu reprezante pu lavenir non selman pu Leta

Zini me , osi, pu lemond.

### **Sesyon lor Deba lor Teori lor Linperyalism**

Li ti anime par Sam King, manb SA. Kamarad Sam, dan sa sesyon la, finn remet an kestyon teori inperyalism kuma lagos abitye get li sirtu dimunn kuma David Harvey, John Bellamy Foster ek Alex Callinicos. Dan LALIT nu ena rezerv lor konteni sa sesyon la, dayer buku partisipan ti partaz nu rezerv.

## **Lefe Kanpayn BDS**

### **G4S Security aret investi dan Israel**

Pli gran konpayni sekirite dan lemond *G4S Security* finn anonse an Mars sa lane la pu aret tu so bizness avek Israel dan prosenn 2 an. G4S finn su presyon kanpayn BDS aköz so investisman dan sistem prizon Israel, dan sant kot servi tortir kont prizonye Palestinyin, dan fasilite detansyon, dan koloni ek pu Miray Separasyon.

Sa desizyon G4S la kwinsid avek Zurne Prizonye Palestinyin (17 Avril). Li bon rapel ki zordi ena 7,000 prizonnye politik Palestinyin dan prizon Israel, inklir plis ki 600 deteni san pas Lakur, 400 zanfän, 70 fam( plizir anba 16 an). Pli zenn prizonye Palestinyin ena 12 an. Nu remarke ki mem dan lagazet *Le Matinal* ena lartik lor kimanyer BDS pe trape e afekte Israel.

## **LIBER OSCAR LOPEZ RIVERA!**

LALIT pe organiz enn protestasyon Lindi 20 Zin, 2016 pu azut nu avwa ansam ar dimunn dan enn total 35 diferan pei dan lemond pu fer larg Oscar Lopez Rivera, enn prizonye politik dan Leta Zini.

Li enn resortisan Puerto Rico ki finn dan prizon pu 35 an. Li ferme aköz so partisipasyon dan lalit kont kolonizasyon Puerto Rico par USA.

Sa zur la, le 20 Zin, partu dan 35 pei, enn pu sak lane so lanprizonnman, pu ena aksyon solidarite.

Nasyon Zini so *Komite Spesyal lor Dekolonizasyon* dan New York pe uver so Temwayaz lor Puerto Rico. U kapav lir lor la lor [www.solidarity-us.org/lopezrivera2016call](http://www.solidarity-us.org/lopezrivera2016call).

Anfet depi 1981, Oscar Lopez Rivera ferme dan prizon dan Leta Zini – Nasyon Zini kondann so inkarserasyon – e li prizonye politik ki finn ferme pli lontan dan listwar relasyon US-Lamerik Latinn.

An 1898, Marinn US ti debark Puerto Rico, ti pran kontrol Guvernman, lekonomi ek suvrennte zeneral lil la net. Depi 1946, *Komite Nasyon Zini lor Dekolonizasyon* finn dekret 'drwa inalyenab' oto-determinasyon Puerto Rico.

An 1998, apre *Komision Laverite ek Rekonsilyasyon* dan Sid Afrik, Arsevek Desmond Tutu ansam ar 6 lezot Pri Nobel inn lans enn korl pu larg Oscar Lopez Rivera.

Le 20 Zin, LALIT pe azut so lavwa pu dir, Larg Oscar Lopez Rivera. Kontakte nu pu detay.



LALIT pe lans enn  
“Call for Papers”  
pu enn

## **SINPOZYOM LOR O.N.G.**

Si u anvi prezant enn papye, u kapav propoz enn papye par avoy enn abstrak (enn rezime 150 mo par la) ki bizin rant kot LALIT lalitmail@intnet.mu ubyin LALIT, Main Rd, GRNW, P.Louis

### **Dedlayn pu rezime: 1 Zin, 2016.**

Sinpozyom pu lor tem zeneral kuma:

- \* Natir ONG: Ki enn ONG ete – an term istorik, e zordizur?
- \* Nesesite Lorganizasyon Klas Travayer, ubyin lezot grup oprime, ki Indepandan depi Leta, Patron, Relizyon Organize, ek Lanbasad, dan lalit pu sosyalism.

e lor tem spesifik kuma:

- \* ONG: Kote internasyonal.
- \* ONG dan Repiblik Moris
- \* Pyez Leta Britanik kot ti lak ONG dan kad so konplo “Park Marin”.
  - \* Vize USA dan ogmantasyon so Finansman ONG Moris.
  - \* Rol ONG dan puse neo-liberal pu privatizasyon servis sosyal.
    - \* Danze pu lalit Klas Travayer ki CSR reprezante.
    - \* Danze ki ONG kuma Eco-Bridge ek Love-Bridge reprezante.

Sinpozyom la pu fer  
**Samdi 30, Dimans 31 Ziyet**

Horl Mama Bul Later, Batiman LPT,  
Grand Rivyer Nord Wes, Port Louis.

Pu gayn enn lide dan ki lespri nu pe organiz Sinpozyom la (bi filozofik), ala enn lalist lartik pu lir.

1. Analiz lor Vre Fonksyon O.N.G. dan Sosyete Zordi – par Lindsey Collen  
<http://www.lalitmauritius.org/en/newsarticle/1809/the-objective-role-of-so-many-ngos-today-in-creol/>
2. Enn ekrir par Kamarad Ram (1996), sirtu lor manyer ki, dan enn down-turn dan lalit klas travayer, Leta servi ONG pu li evit furni servis sosyal kuma enn drwa – enn form privatizasyon.
3. James Petras (pibliye 1999), profeser sosyoloji Amerikin, byin bon analist: analiz top.
5. Elsa Wiehe (sinpatizan LALIT, pibliye 2011) ki res dan USA; sirtu lor CSR (Corporate Social Responsibility – patronal).
5. Arundhati Roy (pibliye 2014), ekrivin ek aktivist dan Lend (kurt e briyan).
6. 2 aktivist pa tro koni (pibliye 2015) ki finn ankoler kan zot finn realize ki bann ONG ete: vo lapenn lir.
7. Let LALIT a aktivist Moris (pibliye 2016), pu anonse ki nu pe pans enn sinpozyom lor “ONG”.
8. Open Letter from Diego Garcia Committee to Ngos: “Refuse US Embassy Money!”
9. LALIT so Open Letter to Greenpeace: <http://www.lalitmauritius.org/modules/documents/files/LalitMauritius-3636638817772e42b59d74cff571fbb3.pdf>